

Nsia yi mbwe yi ósono Mareke OSOMO

Wu me mukaana wu luru bupfi ña kara li mikaana myehene mina mi básono mu mi mitala Nsia yi Mbwe yi a Yiisu-Kriste. Baara baakalyele ti wu mukaana wu a nsomo ña kara li mikaana mimye.

Ngughu a ndagha yi odzyi osuo Mareke mu mukaana wu yili ti mu enganma Yiisu, musi Nadzarete, li Mwana a Nzaami.

Mareke ka áli ntumu a Yiisu o, lo nde áli ndughu a Poole ya nde ásala ya Piere. Okughu okala ti mandagha ma ásono nde mu mukaana wu, nde ágyughu mo kundaa Piere, mu matala ma ákatsala nde nsia a bumweẽ bu Yiisu-Kriste ña nsie yi kundaa baara. Nde ásono mukaana wu mu nkooro a babo baala ka bali ba-Dzwife o, mu osuo bo ti mu enganma Yiisu li Mwana a Nzaami. Nzaami ályele mu Bisoño bibi ngili ti nde sa agweghe mbwuru mu obvwuhu basi Isarayelee ba bali baara ba nde. Mu matala ma ógyi Yiisu ña yulu a nsie yi, Isarayelee áli kunsá litumu li basi Rome. Bási Isarayelee bákasá kana ti Kriste wu ósiini a bo Nzaami ogweghe, me nde aakwulu bo kunsá litumu li basi Rome. Lo Yiisu ka ágyi mu nkooro a obvwughu oko o. Nde yini a baara ba básihi Satana ya masumu mu okihi litumu li ndeme áyabvwuhu.

Mu mukaana wu Mareke ályele mandagha ma ósi Yiisu ɲa yulu a nsie yi ya ma áluo nde baara, bumō si ya lipfu li nde ya osighili o nde mu lipfu. Yiisu áluo baara mu lileene, nde ádzuhu babyele, ákabyi mifulu mi mibi ya ákasa bimaã bibi okinimi. Ngu okala ti Yiisu li Mwana a Nzaami, nde ka ásele masanama o, mu kuulu «*Mwana a mbwuru ndeme ka ágyi mu kuulu basalala nde o, lo mu kuulu nde asalala ya agwa bumweē bu nde mu ofuru ekolo mpaala baara balagha babvwughu.*» (10.45).

Bamfumu ba ba-Dzwife bábihi nde, tee mu odzwa nde. Nswe munde wu aanama Yiisu faana okala mukughu mu omono mpara, lo ku masini sa okala a esee.

Bu me bu baakakaba mukaana wu:

- Nsia yi mbwe yi ótsala Dzã Muboghoru: (1.1-8).
- Oboghoru o Yiisu ya bunu Satana ásagha obwihi nde mu masumu: (1.9-13).
- Yiisu áyikala ku Ngalile: (1.14–9.50).
- Yiisu ápala mu bvulu lili Ngalile mu ogye ku Yerusaleme: (10.1-52).
- Liminji li Yiisu lili masini ɲa yulu a nsie: (11.1–15.47)
Mumfwunu a nde,
Lipfu li nde.
- Yiisu sighili ɲa kara li ba bákpí: (16.1-8).
- Yiisu monɲono kundaa binduono bi nde: (16.9-20).

*Maluo ma Dzã Muboghoru
(Mat 3.1-6; Luk 3.1-6; Dzã 1.19-23)*

¹ Ki me ebaana ki Nsia yi Mbwe yi a Yiisu-Kriste, Mwana a Nzaami.

² Ti bu básono mu mukaana a mubighili Edzayi: «Tala, me sa ngweghe ntumu a me ku nkulu a we mu kuulu nde agyighili we nzili.

³ Likyi li munde wu li mu okakehe engubu ku syehe: Ligyighili nzili a Mfumu, lisa mankwulu ma nde makala nsumu!»

⁴ Dzã ágyi, me nde áakaboghoru baara ku syehe, ya áakatsala nsia yi a oboghoru kuu ogyinji mayele, mu obagha kolokolo a masumu.

⁵ Baara bwohono mu etsulu e nsie kii Yude ya baba bvulu lili Yerusaleme bákagye kundaa nde ya bákakihi masumu ma bo ŋa nkulu a baara bwohono. Mu obo Dzã áakaboghoru bo mu nzala wu a Dzurudě.

⁶ Dzã áli alaha eko ki batwu mu mfu a nyama wu baakata ti syamo ya álaha musili wu a mu nkobo a nyama mu bala. Nde ákadza bansense ya nyunju wu musuru.

⁷ Nde ákatsala nsia yi: «Mbwuru wu li mu ogya ŋa mbihi a me luru me mu lileene. Me bu mfunumu, me ka mfaana si eke mu onyana misyi mi bikoghoru bi nde o.

⁸ Me ndi mu okaboghoru be mu madza, lo nde sa aboghoru be mu Mufulu a Ngili.»

Oboghoru o Yiisu-Kriste ya Satana gyele nde ku syehe

(Mat 3.13-17; Luk 3.21-22; Dzã 1.29-34)

⁹ Mu bitsughu bibye, Yiisu áfi ku bvulu lili Nadzarete mu etsulu e nsie kii Ngalile, ya Dzã áboghoru nde mu nzala yi a Dzurudě.

¹⁰ Na ósaapala Yiisu mu madza, nde ámono mayulu mu obaghala ya Mufulu áfi ku yulu ya ásughuru ña yulu a nde mu efaana kii beeme.

¹¹ Likyi líbili mu mayulu ti: «We li Mwana a me wu mukolo, me aakamono esee ki elagha mu we.»

(Mat 4.1-11; Luk 4.1-13)

¹² Ñaana oño, Mufulu ábiri Yiisu ku syehe.

¹³ Oko, Satana ágyeele nde mu bitsughu makwumu-mana (40). Nde áli ña kara li banyama baba musuru, ya bangye-yulu bákasalala nde.

Binduono bi Yiisu-Kriste bi binsomo

(Mat 4.12-17; Luk 4.14-15; Dzã 4.1-3,43-46)

¹⁴ Ña mbihi a ña bátyeghe Dzã, Yiisu ágyene ku Ngalile ya ábaana oluo Nsia yi Mbwe yi a Nzaami.

¹⁵ Nde ákalyele ti: «Matala maato ya Emfumu e Nzaami eeyabehene. Ligyinji mayele, ya lisa kana mu Nsia yi Mbwe.»

(Mat 4.18-22; Luk 5.1-11; Dzã 1.35-51)

¹⁶ Mu matala ma ókaluru Yiisu mu mukogho a mubu wu a Ngalile, nde ámono Simõ ya Andere mbwee a nde, mu okatubu nkoho a bo mu madza ma mubu, mu kuulu bo báli bilebe banswi.

¹⁷ Yiisu ályele kundaa bo ti: «Linama me! Me sa nkirili be bilebe bibi baara.»

¹⁸ Ñaana oño, bo bábulunyaã nkoho a bo ya bánama nde.

¹⁹ Bu afrisehe ela-la, nde ámono Dzake mwana a Nzebede wu baghala, ya Dzã mbwee a nde, ba báli si munsa bwara ya ba bákabaama nkoho.

²⁰ Ñaana oño, nde áti bo mbili, bo bábulusihi taara a bo Nzebede ya basala ba nde munsa bwara, ya bánama Yiisu.

*Baghala nga a mufulu wu mubi
(Luk 4.31-37)*

²¹ Bo báyato ɲa bvulu lili Kaperenawume. Mu etsughu kii Sabate, Yiisu ásono mu nzo a lisamana a ba-Dzwife, ya ábaana oluo.

²² Baara bákakɲimi mu nduo-nduo yi ákaluo nde, mu kuulu nde ka ákaluo ti bu ókaluo baluo-mikyene o, lo ti mbwuru wu li a litumu.

²³ Munsa nzo a lisamana a ba-Dzwife óli a baghala mumô wu áali a mufulu wu mubi wu áakehe engubu ti:

²⁴ «Yiisu musi Nadzarete, we ya bihi ndagha ma? We bu aagyi mu osa kuulu ti bihi lipfighili? Me ngyahaba we na nde li: We li Wu a Ngili wu oogweghe Nzaami.»

²⁵ Yiisu áfyẽ nde ya ályele ti: «Kuru munɲa a we ya pala mu baghala wu.»

²⁶ Mufulu wu mubi ányihi nde mu mpini ya ákehe mungili wu munene. ɲa mbihi onjo nde ábulupala mu baghala munde.

²⁷ Baara bwohono bákakɲimi. Mu obo bákafuhunu bo-a-bo ti: «Yi ma yo? Ma maluo ma manyaghara! Nde li mu otumu si mifulu mi mibi ya litumu, ya mye mili mu ogyughu nde!»

²⁸ Mu obo nsia a Yiisu yítsanama mu etsulu e nsie kii Ngilile kyehehe.

*Yiisu dzuhu buko bu Piere ya babyele balagha
(Mat 8.14-17; Luk 4.38-41)*

²⁹ Yiisu bu apala mu nzo a lisamana a ba-Dzwife, ɲa mbihi onjo ágyene ya Dzake ya Dzã ku nzo a Simô ya Andere.

³⁰ Buko bu Simō wu mukaha áli ágyonjomo mu nkooro a mukaama. Yiisu bu asaayato, bályele nde ndagha oyo.

³¹ Yiisu áyasele ŋa bele a nde ya bu akwara nde mu kwogho, átehebe nde. Mukaama áfi nde ya nde ábwi osalala bo.

³² Mu nkonkolo, ŋa mbihi a ŋa ódzyama tala, bágyi a nde babyele balagha ya banga a mifulu mi mibi.

³³ Baara ba bvulu bwohono báyabvununu ŋa nkulu a munjma a nzo yi áli nde.

³⁴ Nde ádzuhu baara balagha ba báli a mabyele mama mawa-mawa ya ábyi mifulu mi mibi mi-lagha. Ka ágwi muswa kundaa mifulu mi mibi ti mibili o, mu kuulu mye mígyahaba nde.

*Yiisu tsala Nsia yi Mbwe mu Ngalile
(Luk 4.42-43)*

³⁵ Mu minkya-nkya, ŋaala nkini áli ya mpyibi, Yiisu átemene ya ápala mu ogye ku ebini ki egwene a baara ya ábwi osamana.

³⁶ Simō ya baara ba báli ya nde bábaana osagha nde.

³⁷ Mu matala ma bámono bo nde, bo bályele kundaa nde ti: «Baara bwohono bali mu okabulusagha we.»

³⁸ Nde ábvuhulu bo ndiri: «Litswe nkolo nkimi, ku mala ma mali bitaataa bi, mpaala me nduo si oko, mu kuulu me mu obo me aangyi ŋa nsie.»

³⁹ Mu obo nde ágyene mu etsulu e nsie kii Ngalile kyehehe ya ákabululuo mu manzo mama lisamana ma ba-Dzwife, ya ákabyi mifulu mi mibi mu baara.

*Yiisu dzuhu nga-a-buala**(Mat 8.1-4; Luk 5.12-16)*

⁴⁰ Nga-a-buala mutsyini ágyi kundaa Yiisu. Bu akunu mabuo ŋa nsie ŋa nkulu a nde, ábuono nde bu: «Kala ti we dzyi, we kughu osa me wu a tse-tse.»

⁴¹ Yiisu ámono nde nyiĩ. Bu alabala ekee, ábyeme nde ya ályele ti: «Me ndzyi, kala wu a tse-tse.»

⁴² Naana oŋo buala búfi ya nde ásaatsyeme.

⁴³ Naana oŋo Yiisu ábvurulu nde ku bula bu nde, átswi nde mukele mu ebaghala

⁴⁴ ya ályele nde ti: «Yighili ogyughu: Ka lyele mbwuru si mumõ o, lo gye yisuo nyuru a we kundaa ngaa a nzaami, ya gwa mu otsehebe o nyuru a we ekaba ki ótumu Moyidze. Obo sa osuo bumpughulu bu otsyeme o we kundaa baara bwohonono.»

⁴⁵ Lo baghala munde bu agyene, ábwi otsala nsia a ndagha oyo mu mpini ya mu yulu. Mu obo Yiisu ka áfiribagha bu aasomo epankala mu nswe bvulu o. Nde ákabulukala yini a ku mbala a bvulu, mu bibini bi bigwene a baara. Ya baara ba bákafa mu mankolo mwohonono bákagya kundaa nde.

2

*Yiisu dzuhu baghala wu óneŋene binama**(Mat 9.1-8; Luk 5.17-26)*

¹ Ŋa mbihi a mana bitsughu, Yiisu áyabvughuru ku Kaperenawume. Baara básoolo ti nde áli ku nzo.

² Mpwumu a baara yi nene yíbvununu ya ka ófirisyili a ebini munsa nzo o, ngu okala ŋa munjma a nzo. Yiisu ákaluo bo Ndagha a Nzaami.

³ Baara bágyi a nde mbwuru wu óneñene binama wu óbiri babaghala bana.

⁴ Mu kuulu ka bákakughu obiri nde tee ña óli Yiisu o, mu nkooro a mpwumu a baara, bo bákumu ku yulu a see li nzo lili eyala, ña yulu a ebini ki áli bátemene bo, bátobolo lo ya básurulu laba li bálaha baghala wu óneñene binama.

⁵ Yiisu bu amono kana li bo, ályele kundaa baghala wu óneñene binama ndiri: «Mwana a me, masumu ma we baasi mo kolokolo.»

⁶ Onjo óli a ndaama a baluo-mikyene ba bábwi-nsini ba bákatsimi bu mu mikolo mi bo:

⁷ «Mu emakye nde ali mu okabili bu? Nde li mu okatsaala Nzaami. Nande kughu osa masumu kolokolo, kala ka yini a Nzaami o?»

⁸ Ñaana onjo, Yiisu ágyahaba bitsimi bi bo mu mufulu a nde ya ályele bo ndiri: «Mu emakye be lili a bitsimi bibi obo?»

⁹ Emakye egwene a mpara, olyele baghala wu óneñene binama ti: “Baasi masumu ma we kolokolo”, bwunu we olyele ti: “Temene, gwolo laba li we ya dzyara?”

¹⁰ Lo me ndzyi ti be ligyahaba ti Mwana a mbwuru li a litumu ña yulu a nsie mu osa masumu kolokolo.» Nde ályele mbwuru wu óneñene binama ti:

¹¹ «Me ndyele we yo, temene, gwolo laba li we ya bvughuru ku nzo a we.»

¹² Baghala átemene, ñaana onjo ágwolo laba li nde ya ápala mu nzo ña mihi mi baara bwohono. Mu obo baara bwohono bákinjimi ya bákasyighi Nzaami bu bakalyele ndiri: «Kaala bihi nkini límaamono ndagha yi a bu yi o!»

Yiisu ti Lebvi mbili
(Mat 9.9-13; Luk 5.27-32)

¹³ Yiisu áfirigye ku mukogho a mubu wu a Ngalile. Mpwumu a baara yohono yíkagya kundaa nde, ya nde ákaluo bo.

¹⁴ Bu ákaluru, nde ámono Lebvi mwana a Alafe wu baghala wu áabwi-nsini ña nzo yi baakafiri mpagha. Yiisu ályele nde ti: «Nama me!» Lebvi átemene, ya ánama nde.

¹⁵ Bu báli ña tabele ku nzo a Lebvi, mintolo-mpagha milagha ya banga-a-masumu bákadza ebini emō ya Yiisu, ya binduono bi nde. Mu kuulu bo báli balagha ba bakanama nde.

¹⁶ Mu matala ma ómono baluo-mikyene mi míli mu emvununu kii ba-Faridzyē Yiisu mu okadza ya mintolo-mpagha ya banga-a-masumu, bo bályele kundaa binduono bi nde ti: «Mu emakye nde ali mu okadza ya mintolo-mpagha, ya banga-a-masumu?»

¹⁷ Yiisu bu agyughu obo, ályele bo ndiri: «Ka oli baara ba bali nsiili baakakala a nzala a ngaa-libughu o, lo babyele. Me ka aangyi mu ota baara ba bali nsumu mbili o, lo mu ota banga-a-masumu mbili.»

Yiisu luo mu ndagha yi okuru nswele mu bala
(Mat 9.14-17; Luk 5.33-38)

¹⁸ Etsughu emō, binduono bi Dzã ya ba-Faridzyē bákakuru nswele mu bala. Baara báyawulu Yiisu ti: «Binduono bi Dzã ya bibi ba-Faridzyē biikakuru nswele mu bala, lo mu emakye binduono bi we ka biikasa obo o?»

¹⁹ Yiisu ábvuhulu bo ti: «Bandughu ba baghala wu aakie bakughu okuru nswele mu bala mu

matala maala wu aakie li nkini ya bo? Matala mwohono ma baakala bo ya wu aakie, bo ka bakughu okuru nswele mu bala o.

²⁰ Bitsughu sa bigya biili sa bamaha wu aakie. Mu obo, mu bitsughu bibye bo sa akala bakuru nswele mu bala».

²¹ «Ka oli a mbwuru wu aakabaama mupa a eko wu munyaghara ŋa yulu a enkuru ki ekulu o. Amana osa obo, mupa a eko wu munyaghara sa akaghala wu mukulu ya dzunu sa likala li libvulu bunene.

²² Ya ka oli a mbwuru wu aakalo bviini li linyaghara munsa manduru mama mu bibaana bi banyama ma makulu o. Kala pele, bviini sa libulu manduru ya nde sa apfihili bviini ya manduru. Bviini li linyaghara bafaana olo lo mu manduru ma manyaghara.»

Yiisu li Mfumu a etsughu kii sabate

(Mat 12.1-8; Luk 6.1-5)

²³ Mu etsughu etsyini kii sabate, Yiisu ákaluru munsa manseghe ma bele ya binduono bi nde bíkabaluka binsia mu nzili-a-nzili.

²⁴ Mu obo, ba-Faridzyë bályele Yiisu ndiri: «Mu emakye binduono bi we bili mu okagyighili ndagha yiili ka bágwi muswa mu etsughu kii sabate o?»

²⁵ Yiisu ábvuhulu bo bu: «Be nkini áli litaã ndagha yi ósi Dabvide ŋa ákeghele nde ya ófuru nde nzala, nde ya baara ba báli ya nde?

²⁶ Bunu-abo nde ásono munsa nzo a Nzaami mu matala ma óli Abyatare mukwuru a bangaa ba Nzaami. Nde áli mampa ma bágwi Nzaami mukaba, maala yini a bangaa ba Nzaami bali a

muswa mu odza mo. Nde ágwi mo si kundaa ba báli ya nde?»

²⁷ Ya Yiisu áfirilyele bo ndiri: «Bási sabate mu nkooro a mbwuru, lo ka bási mbwuru mu nkooro a sabate o.

²⁸ Mu obo Mwana a mbwuru li mfumu a sabate.»

3

Baghala wu onejene kwogho (Mat 12.9-14; Luk 6.6-11)

¹ Yiisu áfiriyisomo mu nzo a lisamana a ba-Dzwife. Omo óli ya baghala mutsyini wu ónejene kwogho.

² Baara bákatala Yiisu mu omono kala ti nde ákaadzuhu nde mu etsughu kii sabate mpaala babagha ndagha yi baafwunu nde.

³ Mu obo Yiisu ályele kundaa baghala wu ónejene kwogho ti: «Temene ña, ña kara li baara bwohonon!»

⁴ Ña mbihi onjo nde áfwulu bo ti: «Nki ndagha bágwi muswa mu etsughu kii sabate? Osa bubwe bwunu we osa bubi, obvwuhu bwunu we odzwa?» Lo bo ka bátsughu ndagha o.

⁵ Mu obo, Yiisu átala bo bwohonon ya nkehe, ya ámonon nyĩ yi alagha mu nkooro a mikolo ngyi mi bo ya ályele baghala munde ti: «Labala kwogho e we!» Nde álabala kye ya kwogho e nde ébvughuru bu éli nsomo.

⁶ Bu basaapala, ba-Faridzyē bábvuñunu ya baara baba emvuñunu ki Erode mu osagha mayele ma baadzwa nde.

Yiisu dzuhu babyele balagha
(*Mat 4.23-25; 12.15-16; Luk 6.17-19*)

⁷ Yiisu ágyene ku bele a mubu wu a Ngalile ya binduono bi nde. Mpwumu a baara yi nene yínama nde. Yo yífi ku bitsulu bi mansie bibi Ngalile ya Yude,

⁸ ku bvulu lili Yerusaleme, ku etsulu e nsie kii Idume, ku mala mama mu ngulu a nzala yi a Dzurudē, ya ku bitsulu bi mansie bibi ku bele a mabvulu mama ku Tire ya Sidō. Mpwumu a baara yi nene bu yigyughu mandagha mwohono ma ákagyili nde, yígyi kundaa nde.

⁹ Nde ályele kundaa binduono bi nde bitwulu nde bwara, mu kuulu mpwumu a baara yinyaã osa nde mpiji.

¹⁰ Mu kuulu, buulu Yiisu ákadzuhu baara balagha, babyele bwohono bákagyighiri mu nyuru a nde ya bákasagha obyeme nde.

¹¹ Na ókamono nde mifulu mi mibi, mye míkabwa mu nsie na nkulu nde ya míkakehe engubu ti: «We, we li Mwana a Nzaami!»

¹² Lo nde ákatswa mye mukele mu ebaghala mpaala minyaã olyele nde na ali.

Yiisu suolo bantumu kwumu ya buolo
(*Mat 10.1-4; Luk 6.12-16; Big 1.13*)

¹³ Na mbihi oño, Yiisu ákumu ku yulu a munguo. Nde áti babo ba ásuolo nde mbili ya bo bágyi kundaa nde.

¹⁴ Nde ásuolo kwumu ya buolo (12) na kara li bo ya ágwi bo nkwumu yi a bantumu mpaala bakala ya nde ya mpaala nde agweghe bo bayiluo Nsia yi Mbwe.

¹⁵ Nde ágwi bo lileene lili obyi mifulu mi mibi.

¹⁶ Ba me bantumu kwumu ya buolo (12) ba ásuolo nde: Simõ wu ágwi nde nkwumu yi a Piere,

¹⁷ baana ba Nzebede: Dzake ya Dzã mbwee a nde. Yiisu ágwi bo nkwumu yi a Bowanerengese, yidzyi oleyele ti «baana ba nganzele»,

¹⁸ Andere, Filipe, Baretelemi, Matye, Toma, Dzake mwana a Alafe, Tade, Simõ musi kana,

¹⁹ ya Yuda Isikaryote munde wu áatyeghe Yiisu.

Ba buulu Yiisu mpya ti nde li a mifulu wu mubi

²⁰ Na mbihi oño Yiisu ábvughuru ku nzo ya mpwumu a baara yífiribvununu, mu obo Yiisu ya binduono bi nde ka bábagha bu baadza o.

²¹ Badzighi ba Yiisu bu bagyughu obo, bágyi mu oyasyimi nde, mu kuulu bo bákalyele: «Nde ka li mu ofirikasoolo mandagha ma ali mu okagyighili o.»

*Lisumu ña nkulu a Mifulu a Ngili
(Mat 12.24-29; Luk 11.15-22)*

²² Baluo-mikyene ba báfi ku Yerusaleme bákalyele ti: Nde li a «Beledzebule. Me mu lileene li mfumu a mifulu mi mibi nde ali mu okabyi mifulu mi mibi.»

²³ Yiisu áti bo mbili ya ábwi obili ya bo mu mankumu: «Bunu-abo Satana akughu ofiribyi Satana?

²⁴ Kala ti baara ba empu emõ bakaghaba mu odzwana mvulu bo-a-bo, empu ekye ka egyili o.

²⁵ Ya kala ti baara ba dzumu limõ badzwana bo-a-bo, dzumu lilo ka ligyili o.

²⁶ Mu obo kala ti Satana temene nsumu ya ndeme, nde li wu aakaghaba ya nde ka kughu ogyili o, lileene li nde liifi.

²⁷ Ka oli a mbwuru wu kughu osomo mu nzo a mbwuru nga-a-mpini ya gwolo bilogho bi nde, kala ti ka tswama kuru nde misyi o. Kala ti nde kuru nde misyi, nde kughu obiri bilogho byehene bi bili munsa nzo a nde.

²⁸ Mu enganma me ndyele be ti: Nzaami sa asa mandagha mwohonon ma osa baara kolokolo, ngu okala masumu ngu okala otsaala.

²⁹ Lo nswe mbwuru wu aatsaala Mufulu a Ngili si okala ka bunu, ka kughu obagha kolokolo o. Nde li a ebili mu lisumu lili mibvu ya mibvu.»

³⁰ Yiisu ábili obo mu kuulu bo bákalyele ti nde li a mufulu wu mubi.

Ngu dzumu li Yiisu

(Mat 12.46-50; Luk 8.19-21)

³¹ Na mbihi onjo ngughu ya bambwee ba Yiisu báyato. Bo báli ku mbala ya bágweghe mbwuru mu oyita nde mbili.

³² Mpwumu a baara yíbwi nsini ya yísi Yiisu na kara, ya bályele nde ndiri: «Ngughu a we, bambwee ba we ya bankele ba we bali ku mbala, bo bali mu okasagha we».

³³ Yiisu ábvuhulu ndiri: «Nande li ngughu ya bana bali banaana bwunu we bambwee ba me?»

³⁴ Bu atala baara ba bási nde na kara, nde ályele ti: «Ba me bangughu ya bambwee ba me.

³⁵ Mu kuulu, nswe munde wu aasa waa li Nzaami, munde me naana bwunu we mbwee a me, nkele a me ya ngughu a me.»

4

Nkumu yi a mbwuru wu aanyaghala nsia (Mat 13.1-9; Luk 8.4-8)

¹ Yiisu áfirikaluo ña mukogho a mubu. Mpwumu a baara yi alagha yíyabvununu ña bele a nde. Mu obo nde ásono munsá bwara ba búli mu madza ma mubu ya ábwi nsini omo. Mpwumu a baara yíbwi nsini ña nsie mu mukogho a mubu.

² Nde ákaluo bo mandagha malagha mu mankumu. Kunsá mandagha ma ákaluo nde, nde ákalyele bo ndiri:

³ «Ligyughu! Etsughu nga-emõ, mukunu mutsyini ápala mu oyikunu.

⁴ Mu matala ma ákanyahala nde nsia, ndaama a nsia yíbwi mu mukogho a nzili. Banmini bágyi ya báli yo.

⁵ Ndaama yinke yíbwi ña ebini ki éli a mameẽ, ñaala nsie ka yili a mubighi o. Mburu yímene mu maswa-maswa, mu kuulu nsie áli yi asala.

⁶ Lo mwiĩ bu abala, mye mídzighi ya míkee mu kuulu misumunu ka míli a midza o.

⁷ Nsia yinke yíbwi kunsá mingaama, ya mingaama bu mikulu mísi yo mpinĩ ya yo yíkwono oburu bimburu.

⁸ Lo ndaama a nsia yinke yíbwi mu nsie yi mbwe. Yo yímene, yíkulu ya yíburu mburu. Miti mi mike miburu mburu makwumu-matere (30), yinke mburu makwumu-masemene (60), yinke mburu nkama (100)».

⁹ Ña mbihi oño Yiisu ályele ti: «Nyaã munde wu li a matswi mu ogyughu, agyughu!»

*Mu emakye Yiisu aakabili mu mankumu
(Mat 13.10-17; Luk 8.9-10)*

¹⁰ Mu matala ma ágyene nde mu libee, babo ba bádzyi nde emõ ya ba Kwumu ya buolo (12) bábwi ofwulu nde mu mi mitala mankumu.

¹¹ Nde ályele bo ti: «Kundaa be baagwa man-sweghe ma Empu e Nzaami, lo kundaa baara baba ku mbala mandagha mwohono okaluru mu mankumu,

¹² mu efaana kiili, *“ngu okala ti bapana mihi, bo ka bamono elogho o, ngu okala ti bo bagyighili ogyughu, lo bo ndagha obaghala we, kala pele sa bagyiñi mayele ya Nzaami sa asa bo kolokolo*.”*»

*Yiisu baala nkumu yi a mukunu
(Mat 13.18-23; Luk 8.11-15)*

¹³ Yiisu áfirilyele bo ti: «Kala ti be ka liibaghala nkumu yi o, lo bunu-abo be likughu obaghala mankumu mwohono ma make?

¹⁴ Mukunu aakakunu Ndagha a Nzaami.

¹⁵ Ba bali mu mukogho a nzili me babo baala mu bo baakakunu Ndagha a Nzaami, lo ña baak-agyughu bo yo, Satana aakayamaha Ndagha yi baakunu mu bo.

¹⁶ Babo ba baakunu mu bibini bi bili a mameë, me babo baala bu bagyughu Ndagha a Nzaami, basaakihi yo mu esee,

¹⁷ lo ka bali a midza mu bomo o. Bo baakasa kana yini a mu mana matala. Ña ookagya mpara bwunu we kimini mu nkooro a Ndagha a Nzaami, oño bo ka baafirikasa kana o.

* 4:12 4.12 Edz 6.9-10

¹⁸ Babake ba baakunu kunsu mingaama, me babo ba baakagyughu Ndagha a Nzaami,

¹⁹ lo minyoŋ mi nsie, ntono a busini bubu mpya ya nzala bilogho bibike bu yisomo mu mikolo mi bo, biikasa Ndagha a Nzaami mpini ya yo ka yiburu mburu o.

²⁰ Babake ba bákunu mu nsie yimbwe, babo me ba baakagyughu Ndagha a Nzaami, bo baakakihi yo ya baakaburu mburu: Mumŋ mburu makwumu-matere (30), wu muke mburu makwumu-masemene (60), mukimi mburu nkama (100).»

*Nkumu yi a mwindi
(Luk 8.16-18)*

²¹ Yiisu áfirilyele bo ti: «Baakatwulu mwindi kunsu nkuru, bwunu we ku nsini a mbughu? Ka ŋa yulu a ebini ki baakatwulu mwindi o?

²² Mu kuulu, ka oli a ndagha si mŋ yi ensweghe yi aagwene omonono ŋa otsyeme o.

²³ Kala ti mbwuru li a matswi mu ogyughu, agyughu.»

²⁴ Yiisu áfirilyele bo ti: «Lisa mayele mu mi liikagyughu be. Eteese ki liikateese be bambaala, me mu kyini ekye si akala baateese be, ya sa bafiribwehe be bi biluru.

²⁵ Mu kuulu, kundaa munde wu li a elogho, sa bafirigwa nde, lo kundaa munde wu gwene a elogho, sa bamaha nde si ekye ki ali a nde.»

Nkumu yi a mburu yi aakakulu yomo

²⁶ Yiisu áfirilyele ti: «Emfumu e Nzaami efaana a mburu yi onyahala baghala munsa nseghe.

²⁷ Ngu okala ti yonjomo, ngu okala ti nde kahala mihi, mwiñ ya mpyibi, mburu yiikalughubu ya yiikakulu, lo nde ka aakagyahaba bunu-a-bo o.

²⁸ Nsie yiikamyehē mburu yomo. Nsomo musumunu aakapala, ŋa mbihi oŋo ensia ya ŋa nseele bele li ligyighili ogyele mu ensia.

²⁹ Ya mburu bu yiisaagyele, batsyiri yo mu mukpere wu a furunu mu kuulu matala mama otolo mburu maato».

Nkumu yi a mburu a mutaade

(Mat 13.31-32; Luk 13.18-19)

³⁰ Yiisu áfirilyele ndiri: «Nki efaana likughu ogwolo mu mi mitala Emfumu e Nzaami? Mu nki nkumu likughu osuo kye?

³¹ Kye efaana a liburu li mutaade liili ŋa baakakunu lo mu nsie, lo liluru osala mu mburu yohono yili ŋa busu bu nsie.

³² Lo, kala bakunu lo, limene ya liluru miswoho myehene mutele ya lipaha mampala ma manene. Mu obo banjmini ba mayulu baakatwu manzo ma bo mu mampala ma nde.»

Maluo mu mankumu

(Mat 13.34-35)

³³ Me mu mankumu malagha mama bu Yiisu ákaluo baara Ndagha a Nzaami bwunu a bu bákughu bo ogyughu nde.

³⁴ Nde ákabili ya bo yini a mu mankumu, lo nde ákabaala binduono bi nde mankumu mwohono ŋa áli nde ngasighi ya bo.

Yiisu kahaba efulu ki enene

(Mat 8.18,23-27; Luk 8.22-25)

³⁵ Etsughu kyini ekye mu nkonkolo, Yiisu ályele kundaa binduono bi nde ti: «Litswe lisaghaba ku ngulu a mubu yinke».

³⁶ Bu bamana obvurulu mpwumu a baara, binduono bi Yiisu bígyene ya nde mu bwara mu áli nde. Óli si ya mabwara makimi ya nde.

³⁷ Efulu kii mpini ébwi ofulu ya mampo ma madza mákabwa mu bwara ya bwara búkalwulu mu madza.

³⁸ Yiisu ákayonjomo ku masini ma bwara ya ásiili mutswi mu tsulu li biko. Binduono bísiili nde ya bílyele ti: «Muluo, bihi lili mu okapfighili ya we ka li mu okamono mukolo mpara o?»

³⁹ Yiisu bu asighili, áfyě efulu ya ályele madza ma mubu ti: «Dzuunu! Kala pii!» Efulu éfi, ya edzuunu ki enene égyi.

⁴⁰ Ya nde ályele kundaa bo ti: «Mu emakye be lili a nzalamweě? Be nkini ka lili a kana o?»

⁴¹ Enkwughu ki enene ésughuru bo ya bákabili bo-a-bo ti: «Nde nande ali, mbwuru wu, wuulu efulu ya mubu biikagyughu nde?»

5

Yiisu byi mifulu mi mibi ŋa Ngadara (Mat 8.28-34; Luk 8.26-39)

¹ Yiisu ya binduono bi nde báto ku ngulu yinke yi a mubu mu etsulu e nsie ki ba-Ngerasenyee.

² Yiisu bu asaapala mu bwara, baghala mutsyini wu áali a mifulu wu mubi ápala kunsa mampyeme ya áyabwana nde.

³ Nde kunsá mampyeme ákakala ya ka óli a mbwuru wu áakughu ofirikuru nde misyi o, ngu okala basyene.

⁴ Mu kuulu, mansa malagha bákawulu nde myili kunsá edzu ya bákakuru nde mu basyene, lo nde ákabulu edzu ya ákatsyiri basyene. Ya ka óli a mbwuru nga-a-mpini mu odzarala nde o.

⁵ Matala mwohonó, mpyibi ya mwĩĩ, nde áli kunsá mampyeme ya ku yulu a minguo. Nde ákabulukehe bingubu ya ákabuludzwaha nyuru a ndeme mu mameẽ.

⁶ Nde átaala Yiisu, áyabara, ákunu mabuo mu nsie ŋa nkulu a nde,

⁷ ya ákehe engubu ti: «Yiisu, Mwana a Nzaami, Nzaami wu a Ensoõ-yulu, nki ndagha li ŋa kara li bihi a we? Me mbuono we mu nkwumu a Nzaami, ka mwẽhẽ me kimini o!»

⁸ Nde ábili obo mu kuulu Yiisu ákalyele nde ti: «Mufulu wu mubi, pala mu baghala wu!»

⁹ Yiisu áfwulu nde ti: «Nkwumu a we na?» Nde ábvuhulu ti: «Nkwumu a me Mpwumu, mu kuulu bihi balagha lili.»

¹⁰ Ya nde ábuono Yiisu ku olagha ti nde anyaa ogweghe mifulu mi mibi ku nsie nkimi.

¹¹ Ankoho, óli a mukaã a bangubulu wu munene ŋa bele a munguo ba báli mu okabuludza.

¹² Mifulu mi mibi míbuono Yiisu ti: «Gweghe bihi mu bangubulu banii, nyaã bihi lisomo mu bo.»

¹³ Nde ágwi bo muswa ya mifulu mi mibi mípala, míyisomo munsá bangubulu ya bangubulu bwohonó básughu ku nsie a

munguo ya báyibwa mu mubu. Bo áli bakughu oto mapfwunu-muolo (2 000), ya bangubulu bwohono bákpi mu madza ma mubu.

¹⁴ Baara ba bákakebe bangubulu bábara ya báyitsala nsia kunsá bvulu ya mu mala, ya baara báyitala nki ndagha áaluru.

¹⁵ Bo báyanto kundaa Yiisu ya bo bámono baghala wu áali a mpwumu a mifulu mi mibi, wu áabwi nsini, wu áalaha binkuru ya wu áali a embwuru e nde kyehene. Bo bábagha nzalamweẽ.

¹⁶ Baara ba bámono mandagha ma máluru bályele bo mi míbwi mu baghala wu áali a mifulu mi mibi ya mu bangubulu.

¹⁷ Mu obo, bo bábwi obuono Yiisu mpaala amara mu etsulu e nsie e bo.

¹⁸ Mu matala ma ókasomo Yiisu munsa bwara, baghala wu áali a mifulu mi mibi ábuono nde mu okala ya nde.

¹⁹ Lo Yiisu ka ágwi nde muswa o ya ályele nde ndiri: «Gye ku nzo a we, kundaa baara ba we ya lyele bo mandagha mwohono ma oogyighili Mfumu mu we, bunu-abo nde aamono we nyii.»

²⁰ Nde ágyene ya ábaana otsala nsia a mandagha mwohono ma ogyighili nde Yiisu mu etsulu e nsie ki baakata Mabvulu-kwumu, ya baara bwohono bákijimi.

*Mwana a Dzayiruse wu mukaha ya mukaha wu aakwara enkuru e Yiisu
(Mat 9.18-26; Luk 8.40-56)*

²¹ Yiisu áfiribvughuru ku ngulu a mubu yinke mu bwara, ya mpwumu a baara yiyabvununu ŋa áli nde ŋa mukogho a mubu.

²² Mfumu a nzo a lisamana a ba-Dzwife mumõ, nkwumu a nde Dzayiruse, áyato. Bu amono Yiisu, nde ábwi ña nsie a myili mi nde,

²³ ya ábuono nde ku olagha ti: «Mwana a me wu asala wu mukaha li kunsá lipfu. Gya, naã nde myaã mpaala nde abvwughu ya akala mweẽ!»

²⁴ Yiisu ágyene ya nde. Mpwumu a baara yi nene yínama nde ya yíkasa nde mpíñi.

²⁵ Ankoho óli a mukaha mutsyini ña nsa baara babo wu áali a ebyele kii okapala makili ki ési bamvulu kwumu ya buolo (12).

²⁶ Nde ámono mpara yi alagha ña myaã mi bangaa-libughu balagha, ya ámana nzi a nde yohono wene a omono bubwe, ña yulu a yini a mpara yíikabvulu.

²⁷ Bu agyughu bákabili mu Yiisu, nde ágyi ña nsa baara, ña mbihi a nde ya ábyeme enkuru e nde.

²⁸ Mu kuulu nde ákalyele ti: «Kala me mbyeme yini a enkuru e nde, me sa ndzughu.»

²⁹ Ñaana oño, makili ma mákapala nde mákanama, ya nde ámono mu nyuru a nde ti ádzughu mu bubyele bu nde.

³⁰ Yiisu ásoolo ñaana oño ti lileene lípala mu nde. Nde ákaghala ña nsa baara ya áfwulu ti: «Nande aabyeme binkuru bi me?»

³¹ Binduono bi nde bílyele nde ndiri: «We li mu okamono mpwumu a baara ba bali mu okasa we mpíñi, ya we firifwulu ti: “Nande aabyeme me?”»

³² Lo Yiisu átala ña kara li baara mu omono mbwuru wu áabyeeme nde.

³³ Mukaha bu agyhaba mi míbwi mu nde, ábwi oteghere mu nzalamweẽ, ábwi ña myili mi Yiisu ya ályele nde engañma kyehene.

³⁴ Lo Yiisu ályele nde ndiri: «Mwana a me wu mukaha, kana li we liibvwuhu we. Gye mu edzuunu, nyaã we dzughu mu bubyele bu we.»

³⁵ Yiisu áli nkini mu okabili ña óyato baara ba báfi ku nzo a mfumu a nzo a lisamana a ba-Dzwife, ba bályele ndiri: «Mwana a we aakpi. Mu emakye we aafirisa Muluo enkwili mu mwana a we?»

³⁶ Lo Yiisu wu áagyughu mandagha mamó ályele kundaa mfumu a nzo a lisamana a ba-Dzwife ti: «Ka kala a nzalamweẽ o, sa yini a kana.»

³⁷ Ya nde ka ákihi ti baara bagye nzili mō ya nde o, kala ti ka yini a Piere, Dzake, ya Dzã mbwee a Dzake.

³⁸ Bu bato ña nzo a mfumu a nzo a lisamana a ba-Dzwife, Yiisu ámono mpwumu a baara yi áali kunsá kyaã. Baara bákálili ya bákakehe bingubu.

³⁹ Bu asomo munsa nzo, nde ályele bo ti: «Kyaã ki kii ema ya bilili bi bii ema? Mwana ka aakpi o, lo nde ogyonomo aagyonomo.»

⁴⁰ Bo bákasebe nde. Bu apaha baara bwohonó ku mbala, Yiisu ágwolo taara ya ngughu, ya ba báli ya nde, ásono ku óli mwana.

⁴¹ Nde ákwara mwana mu kwogho ya ályele nde ndiri: «Talita kume», mbaala ti, «Mutughu, me ndyele we ti: Sighili!»

⁴² Ñaana oño, mutughu átemene ya ábwi odz-yara. Nde áli a bamvulu kwumu ya buolo (12). Bo bákinimi ku olagha.

⁴³ Yiisu átswi bo mikele mu kuulu mbwuru si mutsyini anyaa osoolo ndagha oyo, ya nde ályele bo bagwa mutughu bi-odza.

6

*Baara ba Nadzarete ka basi kana mu Yiisu o
(Mat 13.53-58; Luk 4.16-30)*

¹ Yiisu ámara oño ya ágyene ku bvulu li nde, ya binduono bi nde bínama nde.

² Etsughu kii sabate bu eto, nde ábwi oluo mu nzo a lisamana a ba-Dzwife. Baara balagha ba bákagyughu nde bákinjimi ya bályele ndiri: «Mb-wuru wu mandagha ma kunu-ako aabagha mo? Nande aagwi nde munzeele wu ya bimaã bi ali mu okasa mu myaã mi nde?

³ Nde ka li munkomo-manzo o, mwana a Mari, naana a Dzake, Yose, Yude ya Simõ? Ya bankele ba nde ka ña bali o, ña kara li bihi?» Bo ka básí kana mu nde o.

⁴ Lo Yiisu ákalyele bo ndiri: «Yini a mu nsie a nde baakabihi ogwa mubighili budziri, ña kara li baara ba dzumu li ndeme ya baba nzo a nde.»

⁵ Oko nde ka ákughu osa emaa si etsyini o, nde yini a ndaama a babyele ádzuhu, babo ba ánaã nde myaã ña yulu mitswi mi bo.

⁶ Yiisu ákinjimi mu kuulu bo ka báli a kana o.

*Yiisu gweghe ba Kwumu ya Buolo (12)
(Mat 9.35; 10.1,5-14; Luk 9.1-6)*

Na mbihi oño, Yiisu ákabulugye mu mala ma máli be-bele ya Nadzarete ya ákabululuo.

⁷ Bu ati bantummu ba nde kwumu ya buolo (12) mbili, ábwi ogweghe bo bagye buolo-buolo ya ágwi bo lileene lili obyi mifulu mi mibi.

⁸ Átswi bo mukele ti banyaã obiri elogho si emõ, ngu okala limpa, ngu okala empogholo bwunu we nzi mu muswele kala ka yini a mukaana o.

⁹ Lo nde ályele bo ti: «Lilaha bikoghoru mu myili ya ka lilaha binkuru bi bila byele o.»

¹⁰ Yiisu áfirilyele bo ti: «Ŋa akala liisomo be munsa nzo nga-mõ, likala omo tee mu matala ma akala liimara be oño.

¹¹ Ya kala ti mu ebini nga-emõ baara babihi obwana be bwunu we ogyughu be, mu matala ma liimara be oño, likubulu lifufunu li myili mi be, obo sa osuo bumpughulu mu bo.»

¹² Binduono bígyene ya bítsala nsia ti baara báfaana ogyiŋi mayele.

¹³ Bye bíkabyi mifulu mi mibi kyele, bíkakili babyele balagha maala ya bíkadzuhu bo.

Lipfu li Dzã Muboghoru
(Mat 14.1-2; Luk 9.7-9)

¹⁴ Mukogho Erode ágyughu mi ókasa Yiisu. Mu kuulu nkwumu a Yiisu yíkadzumu nsia ya baara bákalyele ti: «Mbwuru wu Dzã Muboghoru aasighili ŋa kara li ba bákpi. Me mu obo nde ali a lileene mu okasa bimaã.»

¹⁵ Babake bákalyele ti: «Munde Eli.» Bakimi bákalyele ti: «Nde li mubighili ti anga mumõ mu mibighili mi bihi.»

¹⁶ Lo Erode bu agyughu mandagha mamu, ályele ti: «Dzã wu aantumu me ti bakehe nde bolo, me nde aasighili ŋa kara li ba bákpi!»

¹⁷ Mu kuulu, Erode ndeme áli aagweghe baara bayisyimi Dzã ya balo nde mu boloko, mu nkooro a Erodyade mukala a Filipe mwana a taara a nde, wu ákie nde.

¹⁸ Mu kuulu Dzã ákalyele Erode ti: «We ka li a muswa mu ogwolo mukala a mwana a taara a we o.»

19 Erodyade áli a mbele a Dzã ya ákasagha odzwa nde. Lo ka ákakughu o,

20 mu kuulu Erode áli a nzalamweẽ a Dzã, bu ábaghala ti Dzã áli mbwuru wu a nsumu ya wu a ngili. Mu obo Erode ákakala nde. Nã ákagyughu nde Dzã, bitsimi bi nde bíkagwimi, lo nde ákagyughu Dzã ya esee.

21 Lo Erodyade ábagha mpeene yi odzwa Dzã etsughu ki ósi Erode malagha mama ndibili a mweẽ a etsughu ki báburu nde. Erode áti mbili mu oyadza basala ba nde baba budziri, bamfumu ba bambumbulu ya bansughu baba etsulu e nsie kii Ngalile.

22 Mwana a Erodyade wu mukaha áyasomo munsa mu bákadza malagha ya ákakini. Makini ma nde mágwi Erode ya baara ba ágwi nde mpighi esee. Mu obo mukogho ályele kundaa mutughu mukaha ndiri: «Luomo me nswe elogho ki dzyi we, me sa ngwa we kye.»

23 Nde álaba mukihi: «Ki aaluomo we me, me sa ngwa we kye, ngu okala ti epa ki empu e me.»

24 Mutughu mukaha ápala ya áfwulu ngughu a nde: «Emakye me aanduomo?» Ngughu a nde ábvuhulu ti: «Mutswi a Dzã Muboghoru.»

25 Mutughu mukaha ábvughuru maswa-maswa kundaa mukogho ya ályele nde ndiri: «Me ndzyi we gwa me mutswi a Dzã Muboghoru mu ndonõ lili.»

26 Mukogho ányoõ ku olagha, lo mu nkooro a mikihi mi álaba nã nkulu ba bákadza, nde ka áli a bu ofiribihi o.

27 Nãana onõ nde ábinjini nkyele mutsyini ya litumu lili ogya a nde mutswi a Dzã. Nkyele

áyikehe Dzã bolo munsã boloko,

²⁸ ya áyabiri mutswi a nde mu ndonõ. Nde ágwi mutswi kundaa mutughu ya mutughu ágwi nde kundaa ngughu a nde.

²⁹ Binduono bi Dzã bu bigyughu ndagha oyo, bíyagwolo ebyimi e nde ya bálo kye kunsa mpyeme.

*Yiisu bununu babaghala mapfwunu mataana
(Mat 14.13-21; Luk 9.10-17; Dzã 6.1-15; Mar 8.1-10)*

³⁰ Bu bayabvununu kundaa Yiisu, bantumu bályele nde mandagha mwohono ma bágyighili ya ma baluo bo.

³¹ Yiisu ályele bo ndiri: «Liyatswe mu libee, ku ebini ki egwene a baara, ya limagwumu.» Mu kuulu baara balagha báakagya ya báakabvughuru, ya bo ka bákabagha si matala mama odza o.

³² Mu obo bo básomo mu bwara mu ogye ku libee, ku ebini ki egwene a baara.

³³ Baara balagha bámono bo mu okagye ya básoolo bo. Mu obo, bo bákafa mu mabvulu mwohono mu myili, bábvununu ya bátswama oyito ku okagye Yiisu ya bantumu ba nde.

³⁴ Yiisu bu apala mu bwara, ámono mpwumu a baara yi nene ya nde ámono bo nyĩ, mu kuulu bo báli *ti anga bindoomo bi bigwene a munkaalabibuolo*. Mu obo nde ábwi oluo bo mandagha malagha.

³⁵ Buulu bwihhi ali ayi ku ogyili, binduono bi Yiisu bíyalyele nde ti: «Ebini ki ka eli a baara o, ya bwihhi buugyili.

³⁶ Bvurulu baara ba ku mala ma bo mpaala bayiswumu bi-odza mu mala ma masala ya ma manene ma mali bitaa-taa bi.»

³⁷ Lo Yiisu ábvuhulu bo ti: «Be beme, ligwa bo bi-odza!» Bo bályele nde ndiri: «We dzyi ti bihi liyiswumu mampa ma makughu mu nkamagyolo yi a denye ya bihi ligwa bo mo?»

³⁸ Yiisu áfwulu bo ti: «Mampa kpe be lili a mo? Ligye limatala.» Bu bayitala, bályele nde ndiri: «Mampa mataana ya banswi buolo lili a bye.»

³⁹ Mu obo, Yiisu ágwi bo litumu mu obwihi baara nsini mu yulu a nsele yi a manee mu mampwumu.

⁴⁰ Baara bábwí-nsini mu miluo mini baara nkama (100), mi mike baara makwumu-mataana (50).

⁴¹ Nde bu agwolo mampa mataana mamó ya banswi buolo babo, átaala ku yulu ya ábvurulu matuono. Na mbíhi oño, ákehe mampa ya ágwi mo kundaa binduono bi nde mpaala bo bakaba mo. Yiisu ákaba si banswi buolo kundaa baara bwohono.

⁴² Baara bwohono báli ya bágyughuru ya

⁴³ binduono bítole bitsulu bi mampa ya bibi banswi bi bísyili. Bo báluhu bitubu kwumu ya byele (12).

⁴⁴ Baara ba báli mampa báli babaghala mapfwunu mataana (5 000).

*Yiisu dzyara mu yulu a madza ma mubu
(Mat 14.22-33; Dzã 6.16-21)*

⁴⁵ Naana oño, Yiisu ásiini binduono bi nde mu osomo mu bwara ya mu otswama ku ngulu yinke yi a mubu, ku nkolo yi a bvulu lili Betesayida,

edzighi ki aabvurulu ndeme baara ku manzo ma bo.

⁴⁶ Mu obo nde ásihi bo ya ágyene ku yulu a munguo mu oyisamana.

⁴⁷ Mpyibi bu yibwi, bwara búto kara-a-kara li mubu ya nde ábulusyili ngasighi ña yulu a nseghe.

⁴⁸ Yiisu ámono ti binduono bi nde bákamono mpara mu odzughu bwara, mu kuulu bo báli ku mfulu a efulu. Ku bele a ku ookya bwihi, nde ágyene kundaa bo mu myili ña yulu a madza ya ákaabululuru bo.

⁴⁹ Bu bamono nde mu okayadzyara ña yulu a madza ma mubu, bo bátsimi ti ekye etoomo éeli ya bákehe bingubu.

⁵⁰ Mu kuulu bo bwohonono bákamono nde ya báli a mikolo maã-maã. Ñaana oño Yiisu ábili ya bo ya ályele ti: «Likala a bukyini! Wu me, ka likala a nzalamweẽ o!»

⁵¹ Ya nde ásono mu bwara ya efulu éfi. Bo bákiniimi ku olagha,

⁵² mu kuulu bo ka bábaghala ndagha yi a mampa o: mu kuulu bo báli a mikolo ngyi.

Yiisu dzuhu babyele ku Ngenedzarete

(Mat 14.34-36; Dzã 6.22-25)

⁵³ Bu bamana opala mubu, bo báto ña mbwuu yi a etsulu e nsie kii Ngenedzarete.

⁵⁴ Bo bu basaapala mu bwara, baara básoolo ti munde Yiisu.

⁵⁵ Baara bágyene mu etsulu e nsie kyehe ne ya bákayabiri babyele ña yulu a malaba mu nswe ebini ki bákasoolo ti nde li oño.

⁵⁶ Mu nswe ebini ki ókato Yiisu, mu mala, mu mabvulu, mu manto ma mala, baara bákawulu

babyele mu mambala ya bákabuono nde mu kuulu bo babyeme yini a mufuru a enkuru e nde. Bo bwohono ba bákabyeme nde bákadzughu.

7

*Yiisu ya ekulu ki bankagha
(Mat 15.1-9)*

¹ Ba-faridzyē ya ndaama a baluo-mikyene ba báfi ku Yerusaleme bábvuṇunu ya Yiisu.

² Bo bámono binduono bi nde bibike bi bíkadza myaã mpii, gwene a oswagha myaã.

³ Ankoho ba-Faridzyē ya ba-Dzwife bwohono ka baakadza o kala ti bo ka bagyighili oswagha myaã o, mu kuulu bo baakasalala ekulu ki bankagha-kwuru ba bo.

⁴ Ya mu matala ma baakafa bo ku mbala yi a baara bwohono, bo bafaana otswama otsehebe manyuru nsomo badza. Bo baakasalala mikyene mikimi mimi ekulu e bo ti anga oswagha bibaha, mayughu, bibenene bibi boronze ya mambughu.

⁵ Mu obo ba-Faridzyē ya baluo-mikyene báfwulu Yiisu ti: «Mu emakye binduono bi we biikadza ya myaã mimi mubviini ṇa ebini kii onama ekulu ki bankagha-kwuru?»

⁶ Yiisu ábvuhulu bo ndiri: «Edzayi ágyighili obili bu ookabili mubighili mu be, bampibi, bwunu a bu básono ti:

*“Ekaana ki okasyighi me yini a mu bibolo,
lo mikolo mi bo mili la ya me.*

⁷ *Ku obwunu baakabuono me,
mu kuulu maluo ma bo mali yini a mikyene mi
baara.”*

⁸ Be liikanyaghala mikyene mi Nzaami, ya li-
ikanama ekulu e baara.»

⁹ Nde áfirilyele bo ndiri: «Be liikatsili mukyene a
Nzaami ya liikatwulu ekulu e be.

¹⁰ Mu kuulu Moyidze ályele ti: “Gwa taara ya
ngughu a we budziri” ya “sa badzwa munde wu
aatughu taara ya ngughu a nde.”

¹¹ Lo be, be liikalyele ti: Kala mbwuru lyele
taara bwunu we ngughu a nde ndiri: “Bibye bi
kaangwa me we mu obaha we, bili Korobane,
mbaala ti, ekaba kii ngili”,

¹² be ka lili mu ogwa nde nzili yi ofiribaha taara
bwunu we ngughu a nde o.

¹³ Obo me bu lili mu okakahaba be Ndagha a
Nzaami mu nkooro a ekulu ki lili mu okaluo be.
Ya be liikasa mandagha makimi mama obo.»

*Mandagha ma maakabyihi mbwuru
(Mat 15.10-20)*

¹⁴ Na mbihi oŋo, bu afirita mpwumu a baara
mbili, Yiisu ályele bo ndiri: «Be bwohono
ligyughu ya libaghala!

¹⁵ Ka oli a elogho ki eli ku mbala a mbwuru
kiili bu esomo mu nde esumunu nde o. Lo ngu ki
eekapala mu mukolo a nde ki eekasumunu nde.»

[

¹⁶ Kala ti mbwuru li a matswi mu ogyughu,
agyughu.]*

¹⁷ Mu matala ma ógyene Yiisu ku nzo, ŋa mbihi
a ŋa abulusihi nde mpwumu a baara, binduono
bi nde bífwulu nde mu mi mitala nkumu oyo.

* **7:16 7.16** Mikaana mi mike mimi nsomo-a-nsomo ka mili ya
etsulu ki o.

¹⁸ Nde ályele bo ndiri: «Behe si ka lili a mayele o? Be ka liibaghala o ti ka oli a elogho kii ku mbala kiili bu esomo mu mbwuru ekughu osumunu nde o?

¹⁹ Mu kuulu kye ka eekasomo mu mukolo a nde o, lo mu mila mi nde. Na mbihi onjo kye eekagye ku nto-a-nkwulu[†].» Obo Yiisu ásuó ti bi-odza byehene bili bitsyeme.

²⁰ Nde áfirilyele ti: «Ngu bi biikapala mu mukolo a mbwuru biikasumunu nde.

²¹ Mu kuulu me ku kara, mu mukolo a baara, ookapala bitsimi bi bibi: enkwunu, pfyibi, odzwa baara,

²² obvughu mbughu ya mukala bwunu we mulumu a nganda, nzala a obagha, mukolo mubi, mayele mabi, esighi, nta-ntala yi mbi, oburulu mandagha mu babake, mubili a nyuru, lala.

²³ Mandagha mwohono ma mabi mamo maakapala mu mukolo a mbwuru ya maakasumunu nde.»

Mukaha wuulu ka ali mu-Dzwife o si kana mu Yiisu

(Mat 15.21-28)

²⁴ Yiisu ámara onjo ya ágyene ku etsulu e nsie kii bvulu lili Tire. Oko nde ásomo mu nzo nsyini, nde ka akadzyi o ti mbwuru si mumõ asoolo, lo nde ka ákughu osweme o.

²⁵ Mukaha mutsyini wu áali a mwana wu mukaha wu áali a mufulu wu mubi ágyughu nsia a Yiisu ya áyabwa na baana a myili mi nde.

²⁶ Mukaha munde áli mu-Ngereke, wu báburu ku Siri, mu etsulu e nsie kii Fenisi. Nde abuono

[†] 7:19 7.19 Kabini

Yiisu mu obyi mufulu wu mubi wu áali mu mwana a nde.

²⁷ Lo Yiisu ályele nde ndiri: «Nyaã baana batmatwama ogyughuru, mu kuulu ka oli bubwe mu ogwolo mampa ma baana ya otsili mo kundaa bimbwa-mbwa o.»

²⁸ Lo mukaha ábvuhulu nde ti: «Ngaŋma Mfumu! Lo bimbwa-mbwa bi bili ku nsie a tabele biikadza mpfi-mpfihini yi ookabwihi baana.»

²⁹ Yiisu ályele nde ndiri: «Mu nkooro a mvuru oyo, gye, mufulu wu mubi aapala mu mwana a we wu mukaha.»

³⁰ Nde bu ato ku nzo a nde, áyibaha mwana wu aagyonyomo ŋa yulu a mbughu, mufulu wu mubi áli ápala mu nyuru a nde.

*Yiisu dzuhu enkpa-matswi ki éli nkini
(Mat 15.29-31)*

³¹ Ŋa mbihi oŋo, Yiisu ámara mu etsulu e nsie kii Tire. Nde ábululuru mu bvulu lili Sidõ mu ogye ku nkolo a mubu wu a Ngalile, ya ábulusaghaba etsulu e nsie kii Mabvulu-Kwumu.

³² Bagyi a nde enkpa-matswi ki ékabili mu mpara, ya bábuono nde anaã nde myaã ŋa yulu a mutswi.

³³ Yiisu bu ábiri nde mu libee, mana la ya mpwumu a baara, álo nde milyeme kunsá matswi, átswulu manteẽ mu mulyeme ya ábyeme nde nzalisogho ya manteẽ ma nde.

³⁴ Ŋa mbihi oŋo, nde átala ku yulu, ágwumunu ya ályele ti: «Efata», mbaala ti, «we dzubulu!»

³⁵ Ŋaana oŋo, matswi ma nde mádzubulu, nzalisogho yíleẽ ya ábaana obili ku obwe.

³⁶ Yiisu átswi bo mukele wu ogwene olyele ndagha oyo kundaa mbwuru si mumõ. Lo nswe matala ma ákalighi nde bo banyaã otsala nde nsia, baara bákatsala nsia yiluru.

³⁷ Baara bákakinjimi ku olagha ya bákalyele ti: «Nde aakagyili mandagha mwohonono ma mabwe. Nde li mu okasa kuulu si okala binkpa-matswi bigyughu ya bankini babili.»

8

Yiisu bununu mapfwunu-mana ma baara (Mat 15.32-39)

¹ Mu bitsughu bibye, mpwumu a baara yífiribvununu. Mu kuulu yo nkini ka yíli o, Yiisu áti binduono bi nde mbili ya ályele bo ndiri:

² «Mpwumu a baara yi yili mu ogwa me nyiĩ, mu kuulu bitsughu bitere bo bali ya me, ya ka bali a bi-odza o.

³ Kala me mbvurulu bo ku mala ma bo nzala, sa bakolo mu nzili, mu kuulu ña kara li bo, babake la baafi.»

⁴ Binduono bi nde bíbvuhulu nde ti: «Kunu-ako bakughu obagha mampa mpaala bo bagyughuru ña ebini kiili baara we yi?»

⁵ Yiisu áfwulu bo ti: «Be mampa kpe lili a mo?» Bo bábvuhulu nde ti: «Nsaama.»

⁶ Oño nde átu mu mpwumu a baara babwa-mansini mu nsie. Bu agwolo mampa nsaama mamo, ábvurulu matuono kundaa Nzaami, ákehe mo ya ágwi binduono bi nde mu kuulu bakaba mo, ya bo bákaba mo kundaa mpwumu a baara.

⁷ Bo báli si ya mana binswi-nswi. Yiisu bu amana oseme bye, ályele binduono bi nde bikaba byehe si.

⁸ Baara báli ya bágyughuru, ya bátolo mankuru nsaama bi bitsulu bi bísyili.

⁹ Bo áli bakughu oto mapfwunu-mana (4 000). Na nsele, Yiisu ábvurulu bo ku mala ma bo.

¹⁰ Naana oño Yiisu ásomo mu bwara ya binduono bi nde, ya bágyene ku etsulu e nsie kii Dalamanutu.

*Ba-Faridzyē baluomo Yiisu elyimi kii okiñimi
(Mat 6.1-14; 12.38-39; Luk 11.16,29)*

¹¹ Ba-Faridzyē bágyi kundaa Yiisu, bábaana otsoho ya nde, ya mu otsihi nde, bo báluomo nde elyimi ki eefa ku yulu.

¹² Yiisu ágwumu mu mpini mu mufulu a nde ya ályele ndiri: «Mu emakye baara baba eseene ki bali mu oluomo elyimi? *Mu engañma* me ndyele be yo, ka bagwa elyimi si emō kundaa baara baba eseene ki o.»

¹³ Na mbihi oño, Yiisu ámara oño ya ásomo mu bwara mu ogye ku ngulu a bana yinke.

*Pfini li ba-Faridzyē ya lili Erode
(Mat 16.5-12)*

¹⁴ Binduono bi Yiisu bídzinimi ogwolo mampa. Bo báli yini a limpa litsyini munsa bwara.

¹⁵ Yiisu átswi bo mukele wu: «Lidzubulu mihi ya lisa mayele mu pfini li ba-Faridzyē ya lili Erode.»

¹⁶ Binduono bi Yiisu bíkatsimi bye a bye ti Yiisu bu ábili obo mu kuulu bo ka báli a mampa o.

¹⁷ Nde ábaghala mi bákatsoho bo-a-bo ya áfwulu bo ti: «Mu emakye be lili mu okatsoho ya lili mu

okalyele be a be ti be ka lili a mampa o? Be nkini liibaghala o? Be nkini liikwara o? Mikolo mi be nkini mikubu?

¹⁸ *Be lili a mihi, lo ka lili mu okamono o?*

Be lili a matswi, lo ka lili mu okagyughu o?

Be ka lili mu okalibili mweẽ o

¹⁹ ƚa aantsyiri me mampa mataana mu ogwa kundaa baara mapfwunu-mataana (5 000), bitubu bi bilwulu mu bitsulu bi mampa kpe be liibiri?» Bo bábvuhulu: «Kwumu ya byele (12).»

²⁰ «Ya ƚa aantsyiri me mampa nsaama mu baara mapfwunu-mana (4 000), bitubu bi bilwulu kpe be liibiri?» Bo bábvuhulu ndiri: «Nsaama»

²¹ Yiisu ályele bo ti: «Be nkini liibaghala o?»

Yiisu dzuhu enkpa-mihi

²² Yiisu ya binduono bi nde bíto ku Betesayida. Baara bágyi a nde enkpa-mihi ya bábuono nde abyeme kye.

²³ Yiisu ákwara enkpa-mihi mu kwogho ya ábiri nde ku mbala a bula. Bu atswulu manteẽ ƚa yulu a mihi mi nde, ánaã nde myaã ya áfwulu nde ti: «We li mu omono elogho?»

²⁴ Enkpa-mihi édzubulu mihi ya élyele ndiri: «Me ndi mu okamono baara, me ndi mu okamono bo ti anga miti, lo bo bali mu okabulugye.»

²⁵ Yiisu áfiritwulu nde myaã ƚa yulu a mihi, ya enkpa-mihi bu epana mihi, kye édzughu ya ékamono bubwe.

²⁶ Oƚo Yiisu abvurulu nde ya ályele nde ti: «Ka somo kunsá bula o.»

Piere lyele ti Yiisu me Kriste

(Mat 16.13-20; Luk 9.18-21; Dzã 6.67-71)

²⁷ Yiisu ya binduono bi nde bágyene ku mala ma máli mu etsulu e nsie kii Sedzare lili Filipe. Mu nzili nde ábwi okafwulu binduono bi nde ti: «Mu mbiili a baara, me nande ndi?»

²⁸ Bo bályele nde ndiri: «Baara bana ti we li Dzã Muboghoru, babake ti we li Eli, bakimi si ti we li mumõ mu mibighili.»

²⁹ Yiisu áfwulu bo ti: «Lo mu be, me nande ndi?»
Piere ábvuhulu nde ti: «We, we li Kriste.»

³⁰ Yiisu átswi bo mukele banyaã olyele ndagha oyo kundaa mbwuru.

Yiisu lyele lipfu li nde ya osighili o nde ña kara li ba bákpi

(Mat 16.21-23; Luk 9.22)

³¹ Mu obo, nde ábaana oluo bo ti Mwana a mbwuru áli faana omono mpara yi alagha. Bakwuru, bakwuru ba bangaa ba Nzaami ya baluo-mikyene báfaana obihi nde ya odzwa nde. Ya ña mbihi a bitsughu bitere, nde faana osighili ña kara li ba bákpi.

³² Nde ákalyele bo mandagha mamu epankala. Mu obo Piere ábiri nde mu libee ya áfyẽ nde.

³³ Lo Yiisu bu akaghala, átala binduono bi nde ya áfyẽ Piere ya ályele nde ti: «We Satana! Mara ña nkulu a me, mu kuulu we ka li mu okatsimi ti anga Nzaami o, lo ti anga baara.»

Bunu-abo baanama Yiisu

(Mat 16.24-28; Luk 9.23-27)

³⁴ Ña mbihi oño, nde áti mpwumu a baara ya binduono bi nde mbili, ya ályele bo ndiri: «Kala ti mbwuru dzyi onama me, lo atunu nyuru a ndeme, agwolo kuruwa li nde ya anama me.

³⁵ Mu kuulu, nswe munde wu dzyi obvwuhu laama li nde, sa apfihili lo. Lo, nswe munde wu aapfihili laama li nde mu nkooro a me ya mu nkooro a Nsia yi mbwe, sa abvwuhu lo.

³⁶ Nsa ndaana mbwuru aakala a yo kala ti nde bagha bupfulu bu nsie nsyini ya pfihili laama li nde?

³⁷ Nki elogho mbwuru akughu ogwa mu ogyinji na ebini kii laama li nde?

³⁸ Mu kuulu, munde wu akala aamono budzwa mu me ya mu mandagha ma me na kara li eseene kii enkwunu ya kii banga-a-masumu ki, Mwana a mbwuru si sa amono nde budzwa na akala aayabvughuru nde ya bangye-yulu baba ngili kunsu nsia a Taara a nde.»

9

¹ Yiisu áfirilyele binduono bi nde ya mpwumu a baara ndiri: «*Mu enganyma*, me ndyele be ti, babake mu baara ba bali na ka bakpa o nsomo-a-nsomo bamono Emfumu e Nzaami ki eegya mu lileene.»

*Piere, Dzake ya Dzã bamono Yiisu kighiri
(Mat 17.1-9; Luk 9.28-36)*

² Na mbihi a bitsughu bisemene, Yiisu ábiri Piere, Dzake ya Dzã bo ngasighi mu libee, ku yulu a munguo wu mula. Nde ákighiri na nkulu a bo.

³ Binkuru bi nde bíbwi osehene ya bípenjeme mu bunu liili ka oli a laã lili kughu ogwa bunu lili obo na nsie o.

⁴ Eli ya Moyidze bámonono kundaa bo. Bo bákabili ya Yiisu.

⁵ Piere ályele kundaa Yiisu ndiri: «*Muluo*, Oli bubwe ti bihi-a-be likala ŋa. Litswe litwu bibvulu bitere: etsyini kii we, etsyini kii Moyidze ya etsyini kii Eli»

⁶ Piere ka ákasoolo ndagha yi obili o, mu kuulu bo báli a nzalamweẽ.

⁷ Edzi égyi ya edzyimi-a-dzyimi e kye éfughu bo, ya ndagha yípala kunsá kye: «Wu me Mwana a me wu mukolo, ligyughu nde!»

⁸ Ŋaana oŋo bo bátala nkolo ya nkolo, lo bo ka bámono mbwuru mukimi o ŋa yulu a yini a Yiisu ngasighi ya bo.

⁹ Ŋa bákasughuru bo munguo, Yiisu átswi bo mukele banyaã olyele mbwuru mi bámono bo tee ŋa akala oosighili Mwana a mbwuru mu lipfu.

¹⁰ Bo bási ndagha oyo nsimi, lo bakafumunu bo-a-bo ti: «Osighili mu lipfu bunu-a-bo odzyi olyele?»

*Binduono bigwi Yiisu bifwulu mu Eli
(Mat 17.10-13)*

¹¹ Ya binduono bi Yiisu bífwulu nde ti: «Mu emakye baluo-mikyene baakalyele ti *Eli faana otswama ogya?*»

¹² Nde ábvuhulu bo ti: «Eli tswama ogya mu obvurulu mandagha mwohonó bwunu a bu máli. Bunu-abo bakughu osonó mu Mwana a mbwuru ti nde faana omonó mpara yi alagha ya sa babele nde?»

¹³ Lo me ndi mu olyele be ti Eli ágyi, ya baara bási nde bu bádzyi bo, bwunu a bu oli mandagha ma básonó mu nde.»

*Yiisu dzuhu mwana nga-a-mufulu wu mubi
(Mat 17.14-21; Luk 9.37-43)*

¹⁴ Mu matala ma báyato bo ña óli binduono bibike, bo bámono mpwumu a baara yi nene yi áasi binduono ña kara-a-kara ya baluo-mikyene ba bákatsoho ya bo.

¹⁵ Mpwumu a baara bu yisaamono Yiisu, yíkinjimi ya yíabwana nde mu ntyini mu ogwa nde mboro.

¹⁶ Yiisu áfwulu binduono bi nde ndiri: «Be mu nsa ndagha lili mu okatsoho ya bo?»

¹⁷ Baghala mumõ ña kara li mpwumu a baara ábvuhulu nde ti: «Muluo, me aayambiri mwana a me wu baghala wu li a mufulu wu a nkini kundaa we.

¹⁸ Nswe ebini ki ookasyimi mufulu mwana, agwolo tsili nde mu nsie. Fulu liikapala mwana mu muñma, aakakwere myini ya nyuru a nde yiikatighili. Me aambuono binduono bi we bibyi mufulu me, lo bye ka biileene o.»

¹⁹ Yiisu ályele bo ndiri: «Eseene ki egwene a kana, tee nki matala me akala aankala ya be? Tee nki matala me aankuru mukolo mu be? Ligya a me nde ña!»

²⁰ Bágyi a nde mwana. Mu matala ma ómono mwana Yiisu, mufulu wu mubi ányihi nde mu mpini. Nde ábwi ña nsie ya ákakinjimi, ya fulu líkapala nde mu muñma.

²¹ Yiisu áfwulu taara a mwana ti: «Obaana nki matala nde aakasa bu?» Nde ábvuhulu ndiri: «Obaana bugye bu nde.

²² Ya mansa malagha mufulu aakatsili nde ku mbaa ya mu madza mu odzwa nde. Lo kala we

kughu ogyighili ndagha nga-mõ, mono bihi nyiĩ ya baha bihi!»

²³ Yiisu ályele nde ndiri: «“Kala we kughu!” Munde wu aasa kana kughu ogyighili mandagha mwohonono.»

²⁴ Naana oño taara a mwana ákehe engubu ti: «Me nsi kana! Gya baha ogwene o kana o me!»

²⁵ Yiisu bu amono mpwumu a baara yi aakagya mu ntyini, áfyẽ mufulu wu mubi ályele nde bu: «Mufulu wu a nkini ya wu enkpa-matswi, me ngwi we litumu, pala mu mwana wu, ya ka afiriyasomo mu nde o!»

²⁶ Mufulu wu mubi ákehe mingili ya ányih mwana mu mpini ya ábulupala. Mwana áli ayi ti anga mbwuru wu aakpi. Mu obo baara balagha bákalylele ti nde aakpi.

²⁷ Lo Yiisu, bu akwara mwana mu kwogho, ásiili nde ya mwana átemene.

²⁸ Mu matala ma obvughuru Yiisu ku nzo, binduono bi nde bífwulu nde ña báli bo ngasighi ti: «Mu emakye bihi bameme liikuono obyi mufulu munde?»

²⁹ Yiisu ábvuhulu bo ti: «Yini a mu lisamana be likughu okapaha efa ki mufulu wu obo.»

Yiisu firilyele ndagha yi a lipfu ya osighili o nde ña kara li ba bákpí

(Mat 17.22-23; Luk 9.43-45)

³⁰ Bu bamara oño, Yiisu ya binduono bi nde basaghaba etsulu e nsie kii Ngalile, ya nde ka ákadzyi o ti baara bagyahaba ku áli nde.

³¹ Mu kuulu nde ákaluo binduono bi nde ya ákalylele bo ti: «Sa batyeghe Mwana a mbwuru ña myaã mi baara. Bo sa badzwa nde, ya bitsughu

bitere ɲa mbihi a lipfu li nde, nde sa asighili ɲa kara li ba bákpi.»

³² Lo binduono ka bíkabaghala ndagha oyo o, ya bo báli a nzalamweë mu ofwulu nde.

*Nande bvulu mupfunu ɲa kara li binduono?
(Mat 18.1-5; Luk 9.46-48)*

³³ Yiisu ya binduono bi nde báyanto ɲa bvulu lili Kaperenawume. Bu basomo mu nzo, Yiisu ábwi ofwulu bo ti: «Be mu nsa ndagha liikatsoho mu nzili?»

³⁴ Lo bo ka bátsughu ndagha o, mu kuulu mu nzili, bo bákatsoho bo-a-bo mu osoolo nande mu bo bvulu mupfunu.

³⁵ Mu obo Yiisu ábwi-nsini, áti Bakwumu ya buolo (12) mbili ya ályele bo ti: «Kala mbwuru dzyi okala wu a nsomo, nde faana okala wu ensiele-mbihi mu baara bwohonono ya musala a baara bwohonono.»

³⁶ Nde ágwolo muke-muke, átwulu nde ɲa kara li bo, ya bu abwumu nde, ályele bo ti:

³⁷ «Munde wu aagyagha mu nkwumu a me muke-muke ti anga wu, meme nde agyagha. Ya munde wu gyagha me, ka oli me nde agyagha o, lo munde wu aagweghe me nde agyagha.»

*Ba baakasalala nkwumu a Yiisu
(Luk 9.49-50)*

³⁸ Dzã ályele nde ti: «Muluo, bihi liimono baghala mutsyini wu li mu okabyi mifulu mi mibi mu nkwumu a we. Bihi liisagha nde okahaba mu osa obo, mu kuulu nde ka aakanama bihi-a-be o.»

³⁹ Yiisu ábvuhulu ti: «Ka likahaba nde o, mu kuulu ka oli a mbwuru wuulu bu asi emañ mu

nkhwumu a me, ngaana onjo bwi obili bubi mu me o.

⁴⁰ Mu kuulu, wu gwene bele bihi-a-be, li wu a bihi-a-be.

⁴¹ Ya munde wu akala aagwa be ebaha ki madza mu kuulu be lili baara ba Kriste, *mu enganma* me ndyele be ti, si okala ka bunu, nde ka apfihili mufuru a nde o.»

Mandagha ma maakabwihi baara

(Mat 18.6-11; Luk 17.1-2)

⁴² «Lo, kala mbwuru bwihi mu masumu mumo nga kara li bike-bike bi biikasa kana mu me bi, obvulu bubwe bakuru nde mu bolo limee li linene li baakasighi bimburu ya batsili nde mu mubu.

⁴³ Kala ti kwogho e we eekabwihi we mu masumu, tsyiri kye. Oluru bubwe kundaa we mu osomo mu laama ya ekee etsyini ya bu gyene ku mungele-a-mbaa ya bikee bi we binsa byele, ku mbaa yi aagwene okadzimi. [

⁴⁴]*

⁴⁵ Kala ti kwulu e we eekabwihi we mu masumu, tsyiri kye. Oluru bubwe kundaa we mu osomo mu laama ekara ya bu batsili we ku mungele-a-mbaa ya myili mi we minsa myele. [

⁴⁶]†

⁴⁷ Ya kala ti lihi li we lili mu okabwihi we mu masumu, sorolo lo. Oluru bubwe kundaa we mu osomo mu Emfumu e Nzaami ya lihi litsyini, ya bu batsili we ku mungele-a-mbaa ya mihi minsa myele,

* **9:44 9.44** Minkaana mi mike mimi nsomo-a-nsomo, ka mili a etsulu ki o. † **9:46 9.46** Minkaana mi mike mimi nsomo-a-nsomo ka mili a etsulu ki o.

⁴⁸ oko *bantuŋu ka baakakpa o, ya mbaa ka yïikadzimi o.*»

(*Mat 5.13; Luk 14.34-35*)

⁴⁹ «Mu kuulu sa bagyeele kana li nswe mbwuru mu mbaa, mpaala nswe mbwuru akala a esee ki mungba mu be.

⁵⁰ Mungba li elogho ki ebwe. Lo kala ti mungba pfihihi makwene ma nde, mu nki elogho baabvurulu nde makwene? Likala a mungba mu beme, ya likala kunsu edzuunu be a be.»

10

Maluo ma Yiisu mu mi mitala odzwa mabala
(*Mat 19.1-9*)

¹ Bu amara oŋo, Yiisu ágyene ku etsulu e nsie kii Yude mu ngulu a mwele wu a Dzurudē. Mampwumu ma baara máfiriyabvuŋunu ŋa bele a nde, ya bwunu a bu óli epfu e nde, Yiisu áfiribaana oluo bo.

² Ba-Faridzyē báyafwulu nde, mu otsihi nde, kala ti baghala li a muswa mu obyi mukala a nde.

³ Yiisu ábvuhulu bo ti: «Nsa ndagha Moyidze átu mu be?»

⁴ Bo bályele ti: «Moyidze ágwi baghala muswa wu osono mukaana wu odzwa bala ya obyi mukala a nde.»

⁵ Yiisu ályele bo ti: «Mu nkooro a mikolo ngyi mi be Moyidze ásono mukyene munde.

⁶ Lo ku ebaana ŋa ógyighili Nzaami bilogho byehene, *nde ágyighili bo baghala ya mukaha.*

⁷ *Mu obo baghala sa asihi a taara ya ngughu a nde ya sa akala emō ya mukala a nde.*

⁸ *Bo bansa buolo sa bakala nyuru mō.* Mu obo, ka bafirikala baara buolo o, lo nyuru mō.

⁹ Mbwuru anyaa okabala baara ba óbvuḡhu Nzaami!»

¹⁰ Na bábvuḡhuru bo ku nzo, binduono bi Yiisu si bífwulu nde ndagha oyo.

¹¹ Nde ályele bo ti: «Mbwuru wu byi mukala a nde ya kie mukaha mukimi, nde si lisumu lili obvuḡhu mbughu ya mukaha mukimi na nkulu a mukala a nde wu a nsomo.

¹² Ya kala ti mukaha byi mulumu a nde ya kie baghala mukimi, nde si lisumu lili obvuḡhu mbughu ya baghala mukimi.»

Yiisu seme bike-bike

(Mat 19.13-15; Luk 18.15-17)

¹³ Baara bágyi a bike-bike kundaa Yiisu mu kuulu nde abyeme bye. Lo binduono bi bífyē baara babo.

¹⁴ Yiisu bu amono obo, ákolo nkehe ya ályele kundaa binduono ti: «Linyaā bike-bike bigya kundaa me. Ka likahaba bo o, mu kuulu Emfumu e Nzaami eli kii babo ba bali ti anga bo.

¹⁵ Mu enganma me ndyele be ti, munde wu akala aagwene ogyagha Emfumu e Nzaami ti anga muke-muke akala ka somo mu kye o.»

¹⁶ Na mbihi oṅo, Yiisu ábwumu bye, áseme bye mu okanaā bye myaā.

Yiisu ya baghala wu esini

(Mat 19.16-30; Luk 18.18-30)

¹⁷ Yiisu bu abwi-nzili mu ogye, baghala mutsyini ágyi kundaa nde mu ntyini ya ákunu mabuo mu nsie na nkulu a nde. Nde áfwulu Yiisu ndiri:

«Muluo wu mubwe, emakye me mfaana osa mu obagha laama lili mibvu ya mibvu?»

¹⁸ Yiisu ályele nde ti: «Mu emakye we lyele ti me mbwuru wu mubwe? Ka oli a mbwuru wu mubwe o, yini a Nzaami li mubwe.

¹⁹ We soolo mikyene mi Nzaami: *Ka dzwa o, ka bvughu mbughu ya mulumu bwunu we mukala a nganda-mbwuru o, ka turu o, ka sa bumpughulu bubu mpya o, ka sa mbwuru bubi o, gwa taara ya ngughu a we budziri.»*

²⁰ Baghala munde ábvuhulu ti: «Muluo, me aankebe mikyene mimye obaana bufulu bu me.»

²¹ Yiisu átala nde ya ádzyi nde, ya ályele nde ndiri: «We gwene a elogho etsyini: Gye, tyeghe bilogho bi we byehene, gwa nzi kundaa bawele, ya we sa kala a busini mu mayulu. Na mbihi onjo, gya ya nama me!»

²² Lo nde bu agyughu obo, ámono mukolo mpara ya ágyene kunsá minyoõ, mu kuulu nde áli a busini bulagha.

²³ Yiisu bu atala nkolo ya nkolo, ályele binduono bi nde ndiri: «Oli mpara kundaa bisini mu osomo mu Emfumu e Nzaami!»

²⁴ Binduono bi nde bíkinjimi mu mandagha mamó. Lo Yiisu áfirilyele ti: «Baana ba me, oli mpara mu osomo mu Emfumu e Nzaami!

²⁵ Ka oli mpara kundaa nyama wu baakata ti syamo mu osomo mu lihi li ntuumu o, lo obvulu mpara kundaa esini mu osono mu Emfumu e Nzaami.»

²⁶ Binduono bífirikinjimi ku oluru ya bíkafuhunu bo-a-bo: «Mu obo, nande kughu obvwughu?»

²⁷ Yiisu átala bo ya ályele ti: «Kundaa baara ndagha oyo ka yikughu okala o, lo ka kundaa Nzaami o, mu kuulu Nzaami kughu osa mandagha mwohono.»

²⁸ Piere ábwi-olyele nde ti: «Bihi, bihi liisihi byehene mu onama we.»

²⁹ Yiisu ábvuhulu ti: «Me ndyele be enganma, kala oli a mbwuru wu sihi nzo a nde, banaana, bambwee, bankele, ngughu, taara, baana bwunu we manseghe ma nde mu nkooro a me ya Nsia yi Mbwe

³⁰ ya wu gwene obagha mutala a manzo, banaana, bambwee, bankele, bangughu, baana ya manseghe nkama (100), ya kimini, mu matala ma maagya ya laama lili mibvu ya mibvu.

³¹ Balagha ba bali baba nsomo sa bakala binsiele-mbihi, ya binsiele-mbihi sa bikala baba nsomo.»

Yiisu firilyele mu sa lili tere lipfu ya osighili o nde ña kara li ba bákpi

(Mat 20.17-19; Luk 18.31-34)

³² Bo báli mu nzili mu okakumu ku Yerusaleme, ya Yiisu átswama ku nkulu a binduono. Binduono bíli a enkwughu, ya ba bakanama nde báli a nzalamweẽ. Yiisu áfirigye a Bakwumu ya buolo (12) mu libee ya ábwi-olyele bo mandagha ma akala aabwana a nde ku nkulu:

³³ «Bihi-a-be lili mu okakumu ku Yerusaleme. Sa batyeghe Mwana a mbwuru kundaa bakwuru ba bangaa ba Nzaami ya baluo-mikyene. Bo sa batsyiri nde mukakana wu lipfu, sa batyeghe nde kundaa baara baala ka bali ba-Dzwife o,

³⁴ bo sa basa nde munsensehẽ, sa batswulu nde manteẽ, sa bakaha nde nswanswa ya sa badzwa

nde. Lo ɲa mbihi a bitsughu bitere, nde sa asighili ɲa kara li ba bápki.»

*Ndagha yi oluomo baana ba Nzebede Yiisu
(Mat 20.20-28)*

³⁵ Baana ba Nzebede buolo, Dzake ya Dzã, báyaléle Yiisu ndiri: «Muluo, bihi lidzyi ti we sa bihi mimye mi liiluomo bihi we.»

³⁶ Nde ályele kundaa bo ti: «Emakye be lidzyi ti me nsa mu be?»

³⁷ Bo bályele ti: «Sa kuulu ti ɲa akala we kunsansa a we bihi libwa-nsini, mumõ ku kwogho-akwogho e we, wu muke ku engbambogho e we kii bakaha.»

³⁸ Yiisu ályele bo ti: «Be ka ligyahaba ndagha yi lili mu okaluomo be o. Be likughu onma ebaha kii kimini ki aanma me bwunu we libogho li aambagha me?»

³⁹ Bo bábvuhulu nde ndiri: «Bihi likughu.» Yiisu ábvuhulu bo ti: «Ebaha kii kimini aanma me, be sa linma kye ya be sa libagha libogho li aambagha me.

⁴⁰ Lo mu mi mitala obwa nsini ku kwogho-akwogho e me bwunu we ku engbambogho e me, ka me nkughu ogwa bibini bibye o. Bibini bibye bili bibi ndaa babo ba ogwaa Nzaami bye.»

⁴¹ ɲa ógyughu binduono kwumu bibike obo, bye bíkolo Dzake ya Dzã nkehe.

⁴² Yiisu áti bo bwohono mbili ya ályele ndiri: «Be lisoolo ti ba baakatumu ma nsie baakatumu mo ti anga bamfumu ya baara baba mupfunu baakasuo litumu li bo.

⁴³ Ka oli bumõ ɲa kara li be o. Mbwuru wu dzyi okala mupfunu ɲa kara li be sa akala musala a be.

⁴⁴ Ya munde wu dzyi okala wu a nsomo ŋa kara li be nde sa akala nkana a be.

⁴⁵ Mu kuulu Mwana a mbwuru ka aagyi mu kuulu baara basalala nde o, lo mu osalala baara ya mu ogwa laama li nde mu ofiri ekolo mu baara balagha.»

Yiisu dzuhu Baretime enkpa-mihi
(*Mat 20.29-34; Luk 18.35-43*)

⁴⁶ Yiisu ya binduono bi nde báyanto ŋa bvulu lili Yeriko. Mu matala ma ókapala Yiisu mu Yeriko ya binduono bi nde ya mpwumu a baara yi nene, baghala mutsyini wu aakaluomo baara nzi wu áali enkpa-mihi, ábwi-nsini mu mukogho a nzili. Nkwumu a nde Baretime, mwana a Time wu baghala.

⁴⁷ Nde ágyughu ti Yiisu musu Nadzarete áakaluru ya ábwi-okehe bingubu: «Yiisu Mwana a Dabvide, mono me nyĩ!»

⁴⁸ Baara balagha bákaŋyeē nde mpaala akala pii, lo nde áakakehe bingubu kuu oluru: «Mwana a Dabvide, mono me nyĩ!»

⁴⁹ Yiisu átemene ya ályele ndiri: «Lita nde mbili!» Bati enkpa-mihi mbili ya bályele nde ti: «Kala a bukyini, temene! Nde li mu okata we mbili.»

⁵⁰ Enkpa-mihi etsili enkuru e nde, ékubu-mana étemene ya égyi kundaa Yiisu.

⁵¹ Yiisu áfwulu nde ti: «Emakye we dzyi me nsa mu we?» Enkpa-mihi ébvuhulu nde ndiri: «Muluo, nyaã me mfirmono!»

⁵² Yiisu ályele nde ti: «Gye, kana li we liibvwuhu we.» Ŋaana oŋo, nde ábaana ofirimono ya ábwi onama Yiisu mu nzili.

11

*Osomo o Yiisu mu Yerusaleme
(Mat 21.1-9; Luk 19.28-40; Dzã 12.12-16)*

¹ Mu matala ma báyabehene bo ya Yerusaleme, ku bele a mala mama Betefadze ya Betani, be-bele ya munguo wu a miti mi Olive, Yiisu ágweghe binduono byele.

² Nde ályele bo ndiri: «Ligye ku bula ba buli ku nkulu a be. Na liisaasomo be kunsu bo, be sa limono mwana a aane wu bákuru. Mbwuru nkini amaabwa-nsini na yulu a nde o. Linyana nde ya ligya a nde.

³ Kala ti mbwuru fwulu be ti: “Mu emakye be lili mu okasa bubo?” Be libvuhulu nde bu: “Mfumu li ya nzala a nde”. Mu obo nde sa agweghe nde kunu maswa-maswa.»

⁴ Bo bágyene ya bámono mwana a aane wu bákuru na mbala, na bele a munjma a nzo mutsyini mu munsagha. Bo básurulu nde.

⁵ Ndaama a baara mu ba báli onjo bályele bo ti: «Be ema lili mu okasa? Mu emakye be lili mu okasurulu mwana a aane?»

⁶ Binduono bíbvuhulu bo bwunu a bu ólyele bo Yiisu. Mu obo bo bányaã bo bagye.

⁷ Bágyi a mwana a aane kundaa Yiisu, bágyala biko bi bo na yulu a nde. Yiisu ábwi-nsini na yulu a nde.

⁸ Baara balagha bágyala biko bi bo mu nzili, ya babake bágyala mampala ma miti ma mali a matsyiri ma bátsyiri munsu manseghe.

⁹ Ba báli ku nkulu ya ba bakanama Yiisu bákakehe bingubu:
«Odzaana!

Liseme kundaa munde wu li mu ogya mu nkwumu a Mfumu!

¹⁰ Nyaã Nzaami aseme emfumu ki eli mu ogya, emfumu e Dabvide taara a bihi!
Odzaana mu bibini bibi ku ensoõ yulu!»

¹¹ Yiisu ásomo mu Yerusaleme, munsu nzo a Nzaami. Bu amana otala bibini byehene, ágyene ku Betani ya Bakwumu ya buolo (12) mu kuulu áli ayi nkonkolo.

Mufinge wu gwene a mburu
(Mat 21.18-19)

¹² Mu etsughu ki énama, ña bákapala bo kunsu Betani, nzala yífuru Yiisu.

¹³ Bu ataala ku la mufinge wu áali ya matsyiri, Yiisu áyitala kala ti ákughu omono liburu mu nde. Lo bu ayato, nde ámono yini a matsyiri, mu kuulu ka yili ndo yi a bafinge o.

¹⁴ Mu obo, nde ályele ti: «Mu matala mwohonu, mbwuru si mumõ ka afiridza mburu a we o!» Binduono bígyughu bu óbili Yiisu.

Yiisu byi minta-nkaala mu nzo a Nzaami
(Mat 21.12-17; Luk 19.45-46; Dzã 2.13-17)

¹⁵ Bo báyanto ña Yerusaleme. Bu asomo mu nzo a Nzaami, Yiisu ábwi obyí minta-nkaala ya ba bákaswumu munsu nzo a nzaami, ápfumunu batabele ba ba baakasohobo nzi ya bipehe bi minta-nkaala a mabeeme.

¹⁶ Ya nde ka anyaã baara bakabulubiri bilogho munsu nzo a nzaami o.

¹⁷ Nde ákaluo bo ya ákalyele bo ti: «Buta básonu mu Mandagha ma Nzaami ti:
“Nzo a me sa bata yo nzo yi a lisamana kundaa baara ba bikaana byehene”.

Lo be liikirili yo *ngala a bantwumu.*»

¹⁸ Bakwuru ba bangaa ba nzaami ya baluo-mikyene bágyughu ndagha oyo. Bo bákasagha bunu-a-bo baadzwa nde. Bo báli a nzalamweẽ a nde mu kuulu mpwumu a baara yohono yíkakinjimi ku olagha mu maluo ma nde.

¹⁹ Nkonkolo bu yito, Yïisu ya binduono bi nde bápala mu bvulu.

Kana ya lisamana

(Mat 21.20-22)

²⁰ Mu epala, ña bákáluru bo, binduono bi nde bímono mufinge wu aakee tee ku midza.

²¹ Piere bu alilibi-mweẽ mandagha ma máluru, ályele Yïisu ndiri: «*Muluo*, tala, mufinge wu aabiili we epwolo aakee.»

²² Yïisu ályele bo ti: «Likála a kana mu Nzaami!

²³ Mu engañma me ndyele be ti, mbwuru munde wu akala aalyele munguo wu ti: “Mara ña ya gye yibwa mu mubu”, gwene a okenje mu mukolo a nde o, lo si kana ti mandagha ma alyele nde sa makeele, nde sa amono mo.

²⁴ Me mu obo me ndi mu olyele be ti: Nswe ndagha yi akala liiluomo be mu lisamana, lisa kana ti be liibagha yo ya sa bagwa be yo.»

²⁵ «Ya, ña liikatemene be mu lisamana, kala ti be lili a ndagha ya mbwuru, lisa kolokolo, mpaala Taara a be wu li mu mayulu asa masumu ma behe si kolokolo [

²⁶]*.»

* **11:26 11.26** Minkaana mike mi mi nsomo-a-nsomo ka mili ya etsulu ki o.

*Litumu li Yiisu**(Mat 21.23-27; Luk 20.1-8)*

²⁷ Yiisu ya binduono bi nde bábvughuru ku Yerusaleme. Mu matala ma ákabulugye nde munsá nzo a nzaami, bakwuru ba bangaa ba nzaami, baluo-mikyene ya bakwuru báyamono nde

²⁸ mu ofwulu nde ti: «Mu nki litumu we li mu okagyighili mandagha ma? Ya na aagwi we litumu lilo?»

²⁹ Yiisu ábvuhulu bo ti: «Me efwulu yini a etsyini aangwa be. Ligwa me mvuru, ya me sa ndyele be mu nki litumu me ndi mu okasa mandagha ma.

³⁰ Liboghoró li Dzã ku yulu lífi bwunu we kundaa baara? Ligwa me mvuru.»

³¹ Bo bágyili ofuhunu bo-a-bo bu: «Limana obvuhulu “ku yulu”, nde sa alyele ti: “Mu emakye be liigwene osa kana mu nde?”

³² Ya kala bihi libvuhulu ti: “Kundaa baara”. Bo báli a nzalamweẽ a baara, mu kuulu baara bwohono bákatsimi ti Dzã ali mubighili wu a ngan̄ma.»

³³ Mu obo, bo bábvuhulu Yiisu ti: «Bihi ka lisoolo o.» Ono Yiisu ályele bo ndiri: «Mehe si ka ndyele be mu litumu li na me ndi mu okagyili mandagha ma o.»

12*Nkumu yi a bisala bi bibi**(Mat 21.33-46; Luk 20.9-19)*

¹ Na mbihi on̄o, Yiisu ábwi obili ya bo mu mankumu bu: «Mbwuru mutsyini ákunu nseghe a bviini ya ási yo kunsá ekagha. Nde átsimi dzunu li baakakamana mburu a bviini ya átwu nzo yi

mutele wu mula, ya ɲa mbihi, nde ágwihini ya binkamana bi bviini bákaŋiri nde nzi mu okasalala yo, ya ágyene midzye.

² Matala mama oka mburu bu mato, nde ágweghe musala mutsyini kundaa binkamana bi bviini bibye, mu oyigwolo kaba li mburu a bviini yi báki bo.

³ Lo bo bu basyimi nde, badzwi nde mudzyighi ya babvurulu nde myaã mpě-a-mpě.

⁴ Nga-a-nseghe áfirigweghe musala mukimi kundaa bo, bo bákaaha nde ku mutswi, ya bátwuhu nde budzwa.

⁵ Nde ágweghe musala mukimi, bo bádzwi nde. ɲa mbihi oɲo bo bádzwi basala balagha bakimi ba bágweghe mudzyighi, bwunu we bádzwi bo.

⁶ Nga-a-nseghe ásyili yini a ya mwana a nde wu mukolo. Nde ágweghe nde ku masini mu kuulu ákatsimi bu: “Sa bagwa mwana a me budziri.”

⁷ Lo basala babo báfuhunu bo-a-bo ti: “Wu me munde wu akala aagwolo pfa li taara a nde. Ligya, litswe lidzwa nde ya pfa sa likala lili ndaa bihi-a-be!”

⁸ Mu obo, bo básyimi nde, bádzwi ya bátsili nde ku mbala a ekagha e nseghe a bviini.

⁹ Emakye nga a nseghe a bviini akala aasa? Nde sa agya, sa adzwa basala ba nseghe a bviini, ya nde sa agwa nseghe a bviini kundaa baara bakimi.

¹⁰ Be nkini limaatala Bisono bi Nzaami bi o:
*“Limeẽ li ootsili mitwu-manzo
me lo ayi li libvulu mupfunu ɲa mutswunu.*

¹¹ *Ndagha oyo yiifi kundaa Mfumu,
yo yili ndagha yi okinjimi ɲa mihi mi bihi.”»*

¹² Bamfumu ba ba-Dzwife básagha osyimi Yiisu, lo bo báli a nzalamweẽ a mpwumu a baara. Mu kuulu bo bágghala ti mu bo Yiisu áti nkumu oyo. Bo bányaã nde agye.

Mpagha a Sedzare

(Mat 22.15-22; Luk 20.20-26)

¹³ Na mbihi onjo bamfumu ba ba-Dzwife bágweghe ndaama a ba-Faridzyẽ ya baara baba emvununu ki Erode kundaa Yiisu mpaala bab-wihi nde mu mwere mu mbiili a nde.

¹⁴ Bo báyalyle Yiisu ti: «Muluo, bihi ligyahaba ti we aakalyele nganma, ya we ka aakabara mbwuru o, mu kuulu we ka li a munkaghaba o. We aakaluo nzili a Nzaami mu enganma. Mu obo, bihi lili a muswa bwunu we pele mu ofiri mpagha kundaa Sedzare?»

¹⁵ Lo Yiisu bu asoolo ti bo báli bampibi, nde ábvuhulu bo ti: «Mu emakye be lili mu okatsihi me? Ligya a me mupara wu a denye mumõ, me ntala nde!»

¹⁶ Bo bágyi a nde denye mumõ ya Yiisu áfwulu bo ti: «Edzili ya bisono bi, bibi na?» Bo babvuhulu ndiri: «Bibi ndaa Sedzare.»

¹⁷ Mu obo Yiisu ályele bo ndiri: «Libvurulu kundaa Sedzare bibi ndaa Sedzare, ya kundaa a Nzaami, bibi ndaa Nzaami.» Bo bakinjimi ku olagha mu nkooro a Yiisu.

Efwulu mu mi mitala osighili o baara na kara li ba bákpí

(Mat 22.23-33; Luk 20.27-38)

¹⁸ Ba-Saduseyẽ ba baakalyele ti osighili o baara na kara li ba bákpí ka oli o, bágyi kundaa Yiisu ya báfwulu nde ti:

¹⁹ «Muluo, Moyidze ágwi bihi mukyene wu: *“Kala ti mbwuru kpi wene a mwana ya sihi mupfili, mwana a taara a nde sa agwolo mupfili mpaala aburu sagha li mwana a taara a nde baana.”*

²⁰ Lo, óli a baana ba taara nsaama. Wu a nsomo ákie mukaha, ákpi ya ka ásihi mwana o.

²¹ Mbwee wu áanama nde ágwolo mukaha ya ákpi wene a osihi mwana. Bumõ si mu wu batere.

²² Ya si mumõ mu bo bansa nsaama ka áburu mwana o. Bo bwohono bu bakpi, mukaha si ákpi.

²³ Mu matala ma akala oosighili baara bwohono ña kara li ba bákpi, nde mukala a nande aakala? Mu kuulu bo bansa nsaama áli bákíe nde!»

²⁴ Yíisu ábvurulu bo ti: «Bu me bu lili be kunsá nzi-nzimini, be ka lili mu okabaghala o, ngu okala Bisoño bwunu we lileene li Nzaami.

²⁵ Mu kuulu, mu matala ma akala oosighili baara ña kara li ba bákpi, baara ka bakíe bakala bwunu we balumu o, lo sa bakala ti bangye-yulu mu mayulu.

²⁶ Mu mi mitala osighili o baara ña kara li ba bákpi, be ka lítaã mu mukaana a Moyidze o, mandagha ma ólyele nde Nzaami ña bele a eti-ti: *“Me ndi Nzaami a Abarahame, Nzaami a Idzake, ya Nzaami a Dzake!”*

²⁷ Nde ka li Nzaami a ba bákpi o, lo Nzaami a baba mweẽ. Be lili nkara ba bagwuñumu ku olagha.»

*Mukyene wu a nsomo mu Mikyene
(Mat 22.34-40; Luk 10.25-28)*

²⁸ Mumõ mu baluo-mikyene, wu áagyughu bu bákátsoho bo ya bu ámono ti Yiisu ágwi bo mvuru yi mbwe, áyafwulu Yiisu ndiri: «Nsa mukyene wu li wu a nsomo mu mikyene myehene?»

²⁹ Yiisu ábvuhulu ti: «Wu a nsomo me wu: *“Ligyughu, be basi Isaraye! Mfumu Nzaami a bihi, Mfumu li mumõ,*

³⁰ *Ya we sa dzyi Mfumu, Nzaami a we, mu mukolo a we wohono, mu muwumunu a we ndehene, mu mayele ma we mwohono, ya mu mpini a we yohono.”*

³¹ Mukyene wu a buolo me: *“We sa dzyi nganda-mbwuru ti budzyi we nyuru a weme.”* Ka oli a mukyene mukimi wu luru mimye mu mupfunu o.»

³² Mu obo, muluo-mikyene ályele Yiisu ndiri: «Muluo, we aabili bubwe. We aalyele ngarjma ti *Nzaami li mumõ, ya ka oli a Nzaami mukimi o na yulu a yini a nde.*

³³ *Ya ti odzyi nde mu mukolo wohono, mu mayele mwohono, mu makpa mwohono, ya odzyi nganda-mbwuru ti bu dzyi nyuru a weme, oluru bikaba bi biikadzighi byehene ya mikaba byehene.»*

³⁴ Yiisu bu amono ti nde ábili mu mayele, ályele nde ti: «We ka li la ya Empu e Nzaami o.» Na mbihi oño, mbwuru si mumõ ka áfiribagha bukyini mu ogwa nde bifwulu o.

Kriste ya Dabvide

(Mat 22.41-46; Luk 20.41-44)

³⁵ Yiisu ákaluo munsa nzo a nzaami: «Bunu-abo baluo-mikyene baakalyele ti Kriste li mwana a Dabvide?

³⁶ Dabvide ndeme, mu Mufulu a Ngili, ályele ti:
*“Mfumu aalyele kundaa Mfumu a me ti:
Bwa-nsini ku kwogho-a-kwogho e me
tee ña aantwulu me mitaara mi we ku nsini a myili
mi we.”*

³⁷ Kala ti Dabvide ndeme ti nde Mfumu, bunu-
abo Kriste akughu okala mwana a nde?»
Mpwumu a baara yi nene yi áali onjo yíkagyughu
nde ya esee.

*Yiisu gyehe baara mu bipfu bi baluo-mikyene
(Mat 23.1-36; Luk 20.45-47)*

³⁸ Yiisu ákaluo baara bu: «Lisa mayele mu
baluo-mikyene. Bo badzyi okabuludzye ya
binkuru bi bila. Bo badzyi ti baara bakagwa
bo mamboro mu bibini bi ookabvuñunu baara
bwohonono.

³⁹ Bo baakadzyi bibini bibi nsomo mu manzo
mama lisamana ma ba-Dzwife, ya bibini bibi ku
nkulu mu byiri bii odza.

⁴⁰ Bo baakagwolo bilogho bi bapfiili, ya
baakasa nsamana yi nda mu kuulu baara baka-
mono bo. Bo sa babagha masyeme ma maluru.»

*Ekaba kii mupfiili wu muwele
(Luk 21.1-4)*

⁴¹ Yiisu bu abwi-nsini ña nkulu a ebini ki
baakalo bikaba, ákatala bu ókalo mpwumu a
baara nzi yi mu boronze omo. Bisini bilagha
bíkaló nzi yi alagha.

⁴² Mupfiili mutsyini wu muwele ágyi si, ya álo
mana mipara myele mi mili a mutala wu luru
osala.

⁴³ Mu obo Yiisu áti binduono bi nde mbili ya ályele bo ndiri: «Mu enganma me ndyele be ti, mupfiili wu muwele wu aalo oluru baara bwohono ba baalo munsa ebini ki baakalo bik-aba.

⁴⁴ Mu kuulu bo bwohono baagwi nzi yi bagwene a bo esala, lo nde, kunsu maweene ma nde, aalo nzi yohono yi aakakala a yo, yohono yi akaasalala mu olaama.»

13

*Yiisu bighili otsala o nzo a Nzaami
(Mat 24.1-3; Luk 21.5-7)*

¹ Mu matala ma ókapala Yiisu mu nzo a nzaami, enduono e nde etsyini élyele nde ti: «Muluo, tala ati mameẽ ma, nzo yi bátwu yo bubwe!»

² Yiisu ábvuhulu nde ti: «We li mu omono nzo yi nene yi? Ka osyili limeẽ na yulu a limeẽ likimi o, sa batsala mo mwohono.»

*Bilyimi bi biitswama-nsomo ya masini
(Mat 24.4-8; Luk 21.8-11)*

³ Yiisu áli abwi-nsini ku yulu a Munguo wu a mi-Olibve wu áali nkolo ya nkolo ya nzo a nzaami. Piere, Dzake, Dzã ya Andere bábwi ogwa nde bifwulu na engasighi:

⁴ «Malyele ati bihi, mu nki matala mandagha mamu maatswighi, ya nki elyimi eesuo masini ma bilogho byehene bibye?»

⁵ Mu obo Yiisu ábwi olyele bo ti: «Lisa mayele mbwuru anyaa opfiri be.

⁶ Baara balagha sa bagya ya basalala nkwumu a me, bu balyele ti: “Ngu me Kriste!” Ya sa bapfiri baara balagha.

⁷ Na akala liigyughu be baara mu okabili mu mamvulu ya mansia mama mamvulu, ka likala a nzalamweẽ o, mu kuulu mandagha mwohono mammo mafaana ogya. Lo mammo ka mali masini ma nsie o.

⁸ Mansie sa madzwana ya mansie, ya empu sa edzwana ya empu. Nsie sa yinyiĩ mu mpini mu mambughu malagha, ya sa okala a minzyala. Ekye sa ekala ebaana ki misuo mii oburu».

(Mat 10.17-22; Luk 21.12-17)

⁹ «Lisa mayele mu beme. Sa batyeghe be na mambala ma miyala ya sa bakaha be nswanswa mu manzo mama lisamana ma ba-Dzwife. Sa bafwunu be na nkulu a bamfumu ba bitsulu bi mansie ya mikogho mu nkooro a me. Be sa lisuo bampughulu kundaa bo.

¹⁰ Nsomo a nsomo, bafaana oluo baara ba mansie mwohono Nsia yi Mbwe.

¹¹ Na akala baabiri be ya baatyeghe be, ka likala a mikolo maã-maã mu mi liibili be o. Lo lilyele mi akala baagwa be mu matala maana mammo, mu kuulu ka oli be akala liibili o, lo Mufulu a Ngili».

¹² «Mwana a taara sa atyeghe mwana a taara mu lipfu, ya taara sa atyeghe mwana a nde. Baana sa babihi okala mu litumu li biburu bi bo, ya sa badzwa bo.

¹³ Baara bwohono sa babele be mu nkooro a nkwumu a me, lo munde wu akala aasa mukama tee ku masini sa abvwughu».

Makimini ma manene

(Mat 24.15-22; Luk 21.20-24)

¹⁴ «Na akala liimono be Ngughu a bubi ba buukabyihi na ebini kiili bo ka bufaana okala o –

nyaã munde wu li mu otaã abaghala – oŋo, baara ba baakala ku Yude babara ku minguo.

¹⁵ Mbwuru wu aakala ku yulu a see li nzo lili eyala*, anyaa osughuru, anyaa osomo mu nzo mu ogwolo elogho munsa nzo a nde.

¹⁶ Ya munde wu aakala ku manseghe anyaa obvughuru ku nzo mu oyigwolo enkuru e nde.

¹⁷ Mu bitsughu bibye, nyi yi alagha kundaa bakaha ba baakala a mayimi ya basuomo!»

¹⁸ Lisamana mu kuulu mandagha mamonyaã obwa mu ndo yi a mpie yi alagha!

¹⁹ Mu kuulu bitsughu bibye sa bikala bitsughu bibi mpara yi alagha, mpara yiili obaana ku ebaana e nsie yi ógyighili Nzaami tee mu matala ma, baara nkini bámaamono yo o. Ya si okala ka bunu, mpara yi obo ka yifirikala mu bitsughu bibi nkulu o.

²⁰ Kala ti Mfumu ka ási kuulu bitsughu bibye bikala bipfi o, mbwuru si mutsyini ka ákaabvwughu o. Lo nde aasi bye bipfi mu nkooro a babo ba aasuolo nde.

(Mat 24.23-25)

²¹ «Mu obo, kala mbwuru lyele be ti: “Kriste li ŋa”, bwunu we “Kriste li kunii”, ka lisa kana mu nde o.

²² Mu kuulu bakeretye baba mpya ya mibighili mimi mpya sa bagya. Bo sa basa bilyimi ya mandagha mama okinjimi mu opfiri babo ba osuolo Nzaami kala ti okughu okala.

* **13:15 13.15** *see li nzo lili eyala see li nzo li batwu mu ebagha kii eyala. Ku yulu a see lilo baara bákabwa nsini mu okamoŋo, mu okasamana ya mu okawolo mpie mu nkonkolo.*

23 Likala yeelee! Me ntswama ndyele be mandagha mwohono.»

*Ogya o Mwana a mbwuru
(Mat 24.29-31; Luk 21.25-28)*

24 «Lo mu bitsughu bibye, ŋa mbihi a mpara yi alagha oyo,

Tala sa lipyini,

mwele wu a ngoono ka afirigwa otsyeme o nde o,

25 *Baŋomaŋomo sa babwa ŋa nsie, ya lileene lili ku mayulu sa linyinji.*

26 Na mbihi oŋo baara sa bamono *Mwana a mbwuru mu okagya ŋa yulu a bidzi* ya lileene lili lagha ya nsia.

27 Oŋo nde sa agweghe bangye-yulu ya sa abvughu mu manto ma nsie mansa mana, obaana ku ósini nsie tee ku ósini yulu, baara bwohono ba ásuolo nde.»

*Nkumu yi mufinge
(Mat 24.32-36; Luk 21.29-33)*

28 «Nyaã nkumu yi a mufinge yiluo be: Na osaakadzughu mampala ma nde ya matsyiri maafulu, be liikasoolo ti dzwa liibehene.

29 Bumõ behe si, ŋa akala liimono be mandagha mamu mu omoŋono, lisoolo ti matala maabehene, mo ayi ŋa muŋma a nzo.

30 Mu enganma me ndyele be, eseene ki ka eluru o, mandagha mwohono ma sa mamono.

31 Yulu ya nsie sa biluru, lo mandagha ma me ka maluru o.»

Yini a Taara soolo etsughu ya matala mama masini

³² «Mu mi mitala etsughu ya matala, mbwuru si mumõ ka asoolo o, ngu okala bangye-yulu mu mayulu, bwunu we Mwana, lo yini a Taara soolo.
(*Mat 25.13-15; Luk 19.12-13*)

³³ Lisa mayele, likahala mihi, mu kuulu be ka lisoolo ña ooto matala ma mo o.

³⁴ Sa okala ti anga mbwuru munde wuulu bu agyene ku midzye, bulusihi nzo a nde, gwi litumu kundaa basala ba nde. Nde sa agwa esala kundaa nswe musala a nde, ya sa atumu nkyele a munjma a nzo mu okahala mihi.

³⁵ Mu obo, likahala mihi, mu kuulu be ka lisoolo ña akala oogya mfumu a nzo o. Nde kughu ogya mu nkonkolo, bwunu we mu kara-a-kara a mpyibi, bwunu we ña ookwolo nsuhu-a-nsomo, bwunu we mu epala.

³⁶ Likala a nzalamweẽ ti nde anyaa ogya en-sihibi ya nde anyaa oyabagha be liigyonomo ensama.

³⁷ Ndagha yi ndyele me be, me ndyele yo kundaa baara bwohono: likahala mihi!»

14

Bamfumu ba ba-Dzwife bakuru Yiisu mfwunu
(*Mat 26.1-5; Luk 22.1-2*)

¹ Bitsughu byele bíisyili mu osomo mu kyiri kii Paake ya kii Mampa ma magwene a pfini. Bakwuru ba bangaa ba nzaami ya baluo-mikyene bákasagha bunu-a-bo baasyimi Yiisu mu mayele ya baadzwa nde.

² Bo bákyelele ti: «Ka kunsu kyiri o, mfangolo okala a kyaã ña kara li baara.»

Ku Betani bagyiri Yïisu maala mama mpihi yimbwe

(Mat 26.6-13; Luk 7.36-50; Dzã 12.1-8)

³ Yïisu áli ku Betani, mu nzo a Simõ nga-a-buala – lo nde áli ádzughu – Mu matala ma ákadza nde ña tabele, mukaha mutsyini áyasomo mu nzo. Nde áli a mbwara yi a mu alabatare yi áalwulu mu mananaase mama nare mama nkara a tse-tse, mama ntala yi nene. Bu abulu mbwara, nde ágyiri mananaase ña yulu a mutswi a Yïisu.

⁴ Baara babake bákolo nkehe ya bábili bo-a-bo ti: «Mu emakye nde aasi mananaase ma mfini?

⁵ Ali bakughu otyeghe mananaase ma mu nkama-tere (300) yi a badenye, ya ogwa nzi oyo kundaa bawele!» Ya bo bákolo mukaha munde nkehe.

⁶ Lo Yïisu ályele ndiri: «Linyaã nde! Mu emakye be liimwehẽ nde mukolo mpara? Nde aagyighili ndagha yimbwe mu me.

⁷ Mu kuulu, be sa likala a bawele mu nswe matala, ya be likughu osa bo bubwe ña lidzyi be. Lo me, be ka likala ya me mu matala mwohonon.

⁸ Mukaha wu aasi mi aakughu nde, nde aatswaama ogyogho nyuru a me mananaase nsomo badzyighi yo.

⁹ *Mu enganma* me ndyele be ti, nswe ebini ki akala baaluo Nsia yi Mbwe mu nsie nsyini, sa balyele si mu olibili mweẽ, mandagha ma oosi mukaha wu.»

Yuda bagha bitsimi bii otyeghe Yïisu
(Mat 26.14-16; Luk 22.3-6)

¹⁰ Yuda Isikaryote, mumõ mu Bakwumu ya Buolo (12), áyimono bakwuru ba bangaa ba nza-ami mpaala atyeghe bo Yiisu.

¹¹ Bo bu bagyughu nde, básomo kunsa esee, ya basiini ogwa nde nzi. Mu obo, Yuda ákasagha matala ma mafaana mu otyeghe Yiisu.

*Binduono bibwehẽ kyiri kii Pake
(Mat 26.17-19; Luk 22.7-13)*

¹² Mu etsughu kii nsomo kii kyiri kii Mampa ma magwene a pfini, etsughu ki bákadzwa mu mukaba mwana a endoomo wu baakadza mu Paake, binduono bi Yiisu bífwulu nde ndiri: «Kunu-ako we dzyi ti bihi liyigyighili we bi-odza bibi Paake?»

¹³ Nde ágweghe byele mu binduono bi nde ya ályele bye ti: «Ligye ku bvulu, baghala mutsyini sa ayabwana a be ya yughu li madza. Be linama nde

¹⁴ ya omo mu aasomo nde, lilyele kundaa mfumu a nzo bu: “Muluo bu aalyele: Ngwumu a nzo yi aandza me kyiri kii Paake ya binduono bi me yini-ayo?”

¹⁵ Nde sa asuo be ngwumu yi a ku yulu a nzo yi nene muulu bilogho byehene bikughu. Ngu omo be liigyighili bihi bilogho bibi kyiri.»

¹⁶ Binduono bígyene, bíto ŋa bvulu, bíbwana a mandagha ti bwunu a bu ólyele bo Yiisu ya bye bígyighili bi-odza bibi kyiri kii Paake.

*Yiisu li bi-odza bi Paake ya binduono bi nde
(Mat 26.20-25; Luk 22.21-23; Dzã 13.21-26)*

¹⁷ Nkonkolo bu yito, Yiisu áyato ya Bakwumu a Buolo (12).

¹⁸ Mu matala ma báli bo ña table mu odza, Yiisu ályele ti: «*Mu enganma* me ndyele be, mumõ ña kara li be, wu li mu okadza ya me, sa atyeghe me.»

¹⁹ Bantumú bányoõ, ya bábwi ofwulu nde mumõ-mumõ ti: «Me?»

²⁰ Yiisu ábvuhulu bo ndiri: «Mumõ mu Bakwumu a buolo (12), munde wu aalo kwogho mu ndoõ emõ ya me.

²¹ Mwana a mbwuru li mu ogye, bwunu a bu básono mu nde. Lo nyĩ yi alagha kundaa mbwuru munde wu aakala nzili yi baatyeghe Mwana a mbwuru! Áli obvulu bubwe banyaã oburu mbwuru munde.»

Bi-odza bibi ngili

(Mat 26.26-29; Luk 22.15-20; 1 Kor 11.23-26)

²² Mu matala ma bákadza bo, Yiisu ágwolo limpa, bu amana olyele mandagha mama liseme, átsyiri lo ya ágwi bo lo ya ályele ndiri: «Ligwolo, yi nyuru a me.»

²³ Ña mbihi oño, Yiisu ágwolo ebaha, bu amana obvurulu matuono, ágwi bo kye ya bo bwohono bányi kye.

²⁴ Nde ályele bo ti: «Ma me makili ma me, makili mama ogwihini, ma maatsanama mu nkooro a baara balagha.

²⁵ *Mu enganma* me ndyele be ti, me ka amfirinma bviini o tee mu etsughu ki amfirinma me lo, li linyaghara, mu Emfumu e Nzaami.»

Yiisu lyele ti Piere sa atunu nde

(Mat 26.30-35; Luk 22.31-34; Dzã 13.36-38)

²⁶ Bo bu bamana ogyimi Nzaami bikwumu bibi masyighi, bo bágyene ku Munguo wu a mi-Olibve.

²⁷ Yiisu ályele bo ndiri: «Kana li be bwohono mu me sa libwa, mu kuulu básono ti:

“Me sa nkaha munkala-bibuolo, ya bindoomo sa bitsanama.”

²⁸ Lo ɲa mbihi a ɲa aansighili me ɲa kara li ba bákpí, me sa nswama be ku Ngalile.»

²⁹ Piere ályele nde ndiri: «Ngu okala ti baara bwohono sa babwa mu nkooro a we, lo me ka mbwa o.»

³⁰ Yiisu ábvuhulu nde ndiri: «*Mu enganma*, me ndyele we, mu mpyibi yi a lolo li, nsomo mulumu a nsuhu akuolo nsa ywolo, we sa tunu me mu mansa matere.»

³¹ Lo Piere ási minkanana mi nyuru mu mpini ti: «Si okala ti me nfaana okpa ya we, me ka ntunu we o!» Ya binduono byehene bíbili bwunu obo.

*Lisamana li Yiisu ku Ngetesemane
(Mat 26.36-46; Luk 22.39-46)*

³² Yiisu ya binduono bi nde báto ɲa ebini kii nkwumu Ngetesemane. Nde ályele bo ndiri: «Libwa-nsini ɲa, mu matala ma aansamana me.»

³³ Nde ábiri Piere, Dzake ya Dzã, ya ábaana omono nzalamweẽ yi alagha ya mukolo maɲa-maɲa.

³⁴ Mu obo, nde ályele bo ti: «*Me ndi a nyĩ* mu muwumunu a me tee ku lipfu. Likala ɲa ya likahala mihi!»

³⁵ Bu asehe linku-nkulu eke, ábwi mu nsie ya ábuono Nzaami kala okughu okala ti matala ma mampara ma mamara ɲa busu bu nde.

³⁶ Nde ákalyele ti: «*Aba!* Taara! We aakaleene mandagha mwohono, maha ebaha kii mpara ki

ɲa bele a me! Lo ka bwunu a bu ndzyi me o, lo bu dzyi we.»

³⁷ Yiisu áyabvughuru ya áyabagha bo kunsama. Mu obo nde ályele kundaa Piere ndiri: «Simõ, we aagyonomo! We ka aaleene okahala mihi si mu tala litsyini o!

³⁸ Likahala mihi ya lisamana, mu kuulu be linyaã osomo kunsama bigyeele. Mufulu li a mbaa, lo nyuru yikolo.»

³⁹ Yiisu áfirigye la ya bo ya ábuono Nzaami bwunu a bu ábuono nde nsomo.

⁴⁰ Ya áyabvughuru ya nde áfiriyabaha bo bagyonomo ensama, mu kuulu mihi mi bo áli míleme mu ensama. Bo ka bábagha yi obvuhulu nde o.

⁴¹ Yiisu áfiriyabvughuru mu sa lili tere ya ályele bo ti: «Be nkini ensama lili, be nkini ogwumu liikagwumu! Mandagha mwohono maakeele. Matala maato, Mwana a mbwuru baatyeghe nde ɲa myaã mi banga-a-masumu.

⁴² Litemene, litswe! Munde wu aatyeghe me aayabehene.»

Basyimi Yiisu

(Mat 26.47-56; Luk 22.47-53; Dzã 18.2-12)

⁴³ Naana onjo, ɲaala nde nkini mu okabili, Yuda, mumõ mu Bakwumu a buolo (12), áyapala ya mpwumu a baara yi áali a mapee ya mankwogho ba ógweghe bakwuru ba bangaa ba nzaami, baluomikyene ya bakwuru.

⁴⁴ Munde wu áakatyeghe nde ágwi bo elyimi ki: «Mbwuru munde wu aanyuburu me, me nde.

Lisyimi nde ya ligye a nde ya baara ba baagyili okebe nde.»

⁴⁵ Yuda bu asaayato, ásele kundaa Yiisu ya ályele ndiri: «Muluo!» N̄a mbihi on̄o nde ányuburu Yiisu.

⁴⁶ On̄o bo bábwirili Yiisu ya básyimi nde.

⁴⁷ Mumō mu ba báli on̄o ádzuru lipee li nde, átini musala a mukwuru a bangaa ba nzaami ya ákehe nde tswi.

⁴⁸ Yiisu ályele bo ndiri: «Be liiyasyimi me ya mapee ya mankwogho, ti anga be liiyasyimi ntwumu!

⁴⁹ Bitsughu byehene me aakankala n̄a kara li be ya aakanduo mu nzo a nzaami ya be ka liiyasyimi me o. Lo mu kuulu Bisono bibi ngili bikeele.»

⁵⁰ Mu obo binduono bi Yiisu byehene bínyaghala nde ya bíbara.

⁵¹ Munkuru-mbala mutsyini ákanama Yiisu. Nde ali álaha yini a nkpaã a eko yi a lino. Baara bu basagha osyimi nde,

⁵² nde ábulunyaã nkpaã a eko ya ábara mpene.

Yiisu n̄a nkulu a ekwuru ki ba-Dzwife

(Mat 26.57-58; Luk 22.54-55,63-71; Dzã 18.13-15)

⁵³ Bábiri Yiisu kundaa mukwuru a bangaa ba nzaami. Bakwuru ba bangaa ba nzaami bwohon̄o, bakwuru ya baluo-mikyene bábvuṇunu oko.

⁵⁴ Piere ákanama Yiisu la-la tee munsa mbala a mfumu a bakwuru ba bangaa ba nzaami. Munsa omo, nde ábwi-nsini ya bankyele ba mfumu a bakwuru ba bangaa ba nzaami, ya ákagyoro mbaa.

(Mat 26.59-68; Luk 22.63-71; Dzã 18.19-24)

⁵⁵ Bakwuru ba bangaa ba nzaami ya ekwuru ki ba-Dzwife kyehe ne básagha bampughulu ba bámono Yiisu kunsá epfwumu mpaala badzwa nde, lo ka bábagha o.

⁵⁶ Mu kuulu baara balagha baakasuo bumpughulu bubu mpya mu nde, lo bumpughulu bu bo ka búkagye mu nzili o.

⁵⁷ Mu obo, ndaama a baara babake bátemene, ya báburulu nde ndagha yi:

⁵⁸ «Bihi liigyughu nde mu okalyele ndiri: “Me sa ntsala nzo a nzaami yi yi ótwu myaã mi baara ya mu bitsughu bitere me sa ntwu nkimi yiili ka myaã mi baara miigyighili yo o.”»

⁵⁹ Si okala mu ndagha oyo, bumpughulu bu baara ka bukagye nzili mō o.

⁶⁰ Mu obo, mukwuru a bangaa ba nzaami átemene ŋa kara li mfwunu a baara bwohonó áfwulu Yiisu ti: «We ka li a ndagha yi aabvuhulu o? Nki ndagha we lyele mu bumpughulu bu osuo baara ba mu we?»

⁶¹ Yiisu ka átsughu ndagha o, nde ka ábvuhulu ndagha o. Mukwuru a bangaa ba nzaami áfirifwulu nde ti: «Me we li Kriste, Mwana a Nzaami wu Liseme?»

⁶² Yiisu ábvuhulu ti: «Ngu me. Ya be sa limono *Mwana a mbwuru ábwi-nsini* ku kwogho-a-kwogho ki Lileene li Nzaami, ya bu *aakagya nde ya bidzi bi mayulu.*»

⁶³ Mu obo, mukwuru a bangaa ba nzaami ákaghala binkuru bi ndeme ya ályele ndiri: «Bihi-a-be nzala a bampughulu liifirisyili a yo?

⁶⁴ Be liigyughu bu aatsaala nde Nzaami. Bitsimi bi be bima?» Baara bwohonó bágwi nde ebili ya

bátsyiri nde mukakana wu lipfu.

⁶⁵ Ndaama a baara ŋa kara li bo bábaana otswulu nde manteẽ. Báfughu nde busu, bákakaha nde minkono ya bákalyele ti: Bighili! Ya bankyele bágyagha nde ya bákaha nde mampala.

Piere tunu Yiisu

(Mat 26.69-75; Luk 22.56-62; Dzã 18.17,25-27)

⁶⁶ Mu matala ma óli Piere ku nsie, ŋa mbala, musala wu mukaha mumõ mu basala ba mukwuru a bangaa ba Nzaami áyato oŋo.

⁶⁷ Nde bu amono Piere mu okagyoro mbaa, átala nde ya ályele ti: «Wehe si aakakala ya Yiisu musi Nadzarete.»

⁶⁸ Piere átonu bu ályele ti: «Me ka nsoolo o, me ka ndi mu obaghala mi dzyi we olyele o.» Ŋa mbihi oŋo, nde ápala mu ogye ku nkulu a muŋma a nzo. Mu matala mamo, nsuhu ákwolo.

⁶⁹ Musala wu mukaha ámono nde ya áfirilyele kundaa ba báli oŋo: «Wuhu si li mumõ mu bo.»

⁷⁰ Piere áfiritunu Yiisu. Bu basi mana edzighi ebi, ba báli oŋo báfirilyele Piere ti: «Mu enganma, we li mumõ mu baara ba, mu kuulu wehe si li musi Ngalile.»

⁷¹ Oŋo nde ábwi olaba mikihi mu okabiili mpwoho mu ndeme ti: «Me ka nsoolo mbwuru wu lili mu okalyele be o.»

⁷² Yini a mu matala maana mamo, mulumu a nsuhu ákwolo mu sa lili muolo. Piere álibili mweẽ ndagha yi ólyele nde Yiisu: «Nsomo-a nsomo nsuhu akwolo nsa ywolo, we sa tunu me nsa tere.» Mu obo Piere ágwubulu elili.

15

Yiisu na nkulu a Pilate

(Mat 27.1-2,11-14; Luk 23.1-5; Dzã 18.28-38)

¹ Mu epala-epala, bakwuru ba bangaa ba nzaami, bákuru mfwunu ya bakwuru, baluo-mikyene ya ekwuru ki ba-Dzwife kyehehe. Bu bamana okuru Yiisu binkana, bábiri nde ya bágwi nde kundaa Pilate.

² Pilate áfwulu nde ti: «We, we li mukogho a ba-Dzwife?» Yiisu ábvuhulu nde ti: «Me we lyele yo».

³ Bakwuru ba bangaa ba nzaami báburululu nde mandagha malagha.

⁴ Pilate áfirifwulu nde ti: «We ka bvuhulu ndagha o? Yughu ati mandagha ma bali mu okaburulu we!»

⁵ Lo Yiisu ka áfiribvuhulu ndagha o, obo Pilate ákinjimi.

Bakehe Yiisu mukakana wu lipfu

(Mat 27.15-26; Luk 23.13-25; Dzã 18.39–19.16)

⁶ Mu nswe kyiri kii Pake, Pilate ákapaha bo mbwuru mutsyini mu boloko, munde wu ókaluomo mpwumu a baara.

⁷ Mbwuru mutsyini, wu a nkwumu Barabase, áli mu boloko ya banganda ba nde mu kuulu bo bádzwi mbwuru na bákasa bo ngirini ya ba baakatumu bula.

⁸ Mpwumu a baara yígyene ku nzo a Pilate ya yíbaana oluomo nde apaha bo mbwuru mutsyini mu boloko ti bu óli epfu e nde.

⁹ Pilate ábvuhulu bo ndiri: «Be lidzyi ti me nyaã be mukogho a ba-Dzwife?»

¹⁰ Mu kuulu nde ásoolo ti mu nkooro a mukolo bubi bakwuru ba bangaa ba nzaami bátyeghe nde Yiisu.

¹¹ Lo bakwuru ba bangaa ba nzaami ágwi mpwumu a baara mutswi mpini mu kuulu baluomo Pilate apaha bo Barabase.

¹² Pilate áfirilyele ti: «Emakye be lidzyi me nsa mu munde wu lili mu okata be ti mukogho a ba-Dzwife?»

¹³ Bo báfirikehe bingubu ti: «Komo nde ɲa kuruwa!»

¹⁴ Pilate ákalyele bo ndiri: «Bu nde nsa ndagha yi mbi aasi?» Lo bo báfirikehe bingubu bi biluru ti: «Komo nde ɲa kuruwa!»

¹⁵ Pilate ágwolo munkana wu ogwa mpwumu esee. Nde ányaã Barabase ya nde átumu bakaha Yiisu nswanswa. ɲa mbihi oɲo nde ágwi bo nde mu kuulu bakomo nde ɲa kuruwa.

*Bambumbulu basebe Yiisu
(Mat 27:27-31; Dzã 19.2-3)*

¹⁶ Bambumbulu bábirɪ Yiisu ku kara-a-kara a mbala a nzo a Pilate ya bo báti mpwumu a bambumbulu yohono mbili.

¹⁷ Bo bálaha Yiisu enkuru kii mungala, ya bátwulu ɲa yulu a mutswi a nde muburu wu mansiene.

¹⁸ ɲa mbihi oɲo, bo bábwi ogwa nde mboro ndiri: «Mukogho a ba-Dzwife, mboro a we!»

¹⁹ Bo bákakaha nde edzyara ɲa yulu a mutswi, bákatswulu nde manteẽ ya bákakunu mabuo mu nsie mu obuono nde.

²⁰ Bu bamana osebe nde, bádzwulu nde enkuru kii mungala ya báfirilaha nde binkuru bi nde.

*Bakomo Yiisu na kuruwa**(Mat 27.32-44; Luk 23.26-43; Dzã 19.16-24)*

Na mbihi onjo, bo bágyene a Yiisu mu oyikomo nde na kuruwa.

²¹ Bambumbulu bákwichi baghala mutsyini wu áafi ku manseghe ya áakaluru mu obiri kuruwa li nde. Nkwumu a nde Simõ, musi bvulu li Sirene, taara a Alesandere ya Rufuse.

²² Bo báberi Yiisu ku ebini ki bakata nkwumu «Ngolongota», mbaala ti, «Ebini kii etyee ki mutswi».

²³ Básagha ogwa Yiisu bviini li bábvughu ya miire*, lo nde ábihi onja lo.

²⁴ Bákomo Yiisu na kuruwa ya *bambumbulu bu bati empa kii nga a bwehe me wu aagwolo*, mpaala bakaba binkuru bi nde .

²⁵ Mu tala lili matere na mbihi a makya-mabwihi bo bákomo Yiisu na kuruwa.

²⁶ Bisono bi bíli a ebili ki lipfu li nde bíli a ndagha yi: «Mukogho a ba-Dzwife.»

²⁷ Ebini emõ ya Yiisu bákomo na kuruwa bantwumu buolo, mumõ ku kwogho-a-kwogho, wu muke ku engbambogho.

²⁸ [Obo me bu ótswughu bisono bi nzaami bi biikalyele ti: «Baasi nde mu muluo a baara ba babi.»][†]

²⁹ Baara ba bákaluru mu nzili bákatughu Yiisu ya bákanyih mitswi. Bo bákalyele ti: «Eẽ! We wu

* **15:23 15.23** *miire* Yo yili madza mama mana muti mutsyini ya mali ya ntala yi alagha. Baakasalala mo mu ogyighili maala mama ngili bwunu we mama mpihi yi mbwe ma baakagyogho. Ali bálo mo mu mala mama ñeẽ ma bágwi Yiisu na kuruwa. † **15:28 15.28** Mikaana mi mike mimi nsomo-a-nsomo ka mili ya etsulu ki o.

aatsala nzo a nzaami ya ofiritwu yo mu bitsughu bitere,

³⁰ bvwuhu nyuru a we weme ya suguru na kuruwa!»

³¹ Bakwuru ba bangaa ba nzaami si ya baluo-mikyene bákasebe bo-a-bo ya bákalyele ndiri: «Nde aabvwuhu babake, lo nde ka kughu obvwuhu ndeme o!

³² Nyaã Kriste, Mukogho a Isaraye, asuguru na kuruwa mu matala ma, mu kuulu bihi limono ya lisa kana!» Ba bákomo na yulu a makuruwa ya nde bákaturu nde si.

Lipfu li Yisu

(Mat 27.45-56; Luk 23.44-49; Dzã 19.28-30)

³³ Mu matala ma ntaã a minsene, bwihhi búsi mpyibi na yulu a nsie yohono, tee mu matala mama matere na mbihi a ntaã a minsene.

³⁴ Mu matala mamu, Yisu ákehe engubu: «Eli, Eli, lema sabakatani?» Mbaala ti, «Nzaami a me, Nzaami a me, mu emakye we aanyaghala me?»

³⁵ Ndaama a baara ba báli onjo bágyughu nde, bo bákalyele ti: «Ligyughu, nde li mu okata Eli mbili!»

³⁶ Mbwuru mumõ ábara ntyini mu oyitsubu mun-sana mu bviini lili nje. Nde ákuru nde ku nto a edzyara mpaala agwa Yisu anjama ya ályele ndiri: «Linyaã, litswe limono kala ti Eli sa ayasurulu nde na kuruwa.»

³⁷ Lo Yisu ákehe engubu ki enene ya átaghaba.

³⁸ Nkpana eko yi a mu nzo a Nzaami yíkagha na kara-a-kara, obaana ku yulu tee ku nsie.

³⁹ Mfumu a ekuru ki bambumbulu nkama (100) wu áali onjo bu amono bu ótaghaba Yisu

ályele ndiri: «Ngaŋma baghala wu áli Mwana a Nzaami.»

⁴⁰ Óli si a bakaha ba bákatala la-la. Na kara li bo óli Mari musi bvulu lili Mangadala, Mari ngughu a Dzake wu mu Mumpala ya Dzodze, ya Salome.

⁴¹ Bo bákabulugye ya Yiisu ya bakasalala nde na áli nde ku Ngalile. Óli si a bakaha bakimi ba bayakumu ya Yiisu ku Yerusaleme.

Balo nyuru a Yiisu kunsu mpyeme

(Mat 27.57-61; Luk 23.50-55; Dzã 19.38-42)

⁴² Áli ayi nkonkolo, ya buulu áli etsughu ki baak-abwehẽ Sabate (etsughu ki eekatswama etsughu kii Sabate),

⁴³ Dzodzefe wu a bvulu lili Arimate, mbwuru wu bákagwa budziri mu mfwunu a ekwuru ki ba-Dzwife, ágyi oko. Nde si ákakebe ogya ku Emfumu e Nzaami. Nde ási bukyini ágyene kundaa Pilate mu oluomo ebyimi e Yiisu.

⁴⁴ Pilate ákinjimi mu ogyughu ti Yiisu áli ayi ákpi. Mu obo nde áti mfumu a ekuru ki bambumbulu nkama (100) mbili, ya áfwulu nde kala ti Yiisu edzighi elagha ákpi.

⁴⁵ Mfumu a ekuru ki bambumbulu nkama (100) bu alyele nde ti Yiisu aakpi, Pilate ágwi Dzodzefe nzili yi ogwolo ebyimi e Yiisu.

⁴⁶ Dzodzefe áswumu embwunu ki eko kii lino ya ámaha ebyimi e Yiisu na kuruwa, ádziŋi kye kunsu embwunu ki eko ekye, ya álo kye munsu mpyeme yi bátsimi kunsu limeẽ. Na mbihi oŋo, nde ákyi muŋma a mpyeme mu limeẽ.

⁴⁷ Mari musi Mangadala, ya Mari wu ngughu a Dzodze, bákatala ebini ki bádzyighi Yiisu.

16

Osighili o Yïisu ña kara li ba bákpi

(Mat 28.1-8; Luk 24.1-11; Dzã 20.1-2)

¹ Sabate bu liluru, Mari musî Mangadala, Mari ngughu a Dzake, ya Salome báswumu malyimi mama mpihi yi mbwe mu osa mansagha mu ebyimi e Yïisu.

² Mu etsughu ki liminji kii nsomo, bo bágyene ku mpyeme epala-epala ña ookapala tala.

³ Bo bákalyele bo-a-bo ti: «Nande aakimini bihi-a-be limeẽ li liikiyi munma a mpyeme?»

⁴ Lo bu baseene mihi, bo bámono ti limeẽ li líli li linene, áli ayi bákimini.

⁵ Bu basomo munsa mpyeme, bámono munkuru-mbala mumõ ábwi-nsini mu kwogho-a-kwogho e bo ya álaha enkuru ki ela ya kii buñu. Bo bámono nzalamweẽ.

⁶ Nde ályele bo ti: «Ka líkala a nzalamweẽ o! Be Yïisu musî Nadzarete wu baakomo ña kuruwa líli mu okasagha. Nde aasighili ña kara li ba bákpi. Ka li ña o. Limono ebini ki ali baatwulu nde.

⁷ Lo liyilyele binduono bi nde ya Piere ti: “Yïisu aatswama be ku Ngalile. Oko be liimono nde ti bu áli ályele nde be.”»

⁸ Bo bápala munsa mpyeme, bábara mu okateghere, báli a nzalamweẽ ya bákijimi. Ya bo ka bályele ndagha si mõ kundaa mbwuru o mu kuulu bo báli a nzalamweẽ.

*Yïisu monono kundaa binduono bi nde**

* **16:8 16.9** Mikaana mi mike mimi nsomo-a-nsomo ka mili ya bitsulu bi o.

⁹ [Yiisu bu asighili mu lipfu mu epala ki etsughu ki liminji kii nsomo, nde átswama moŋono kundaa Mari musi Mangadala, mu nde Yiisu áli ápaha mifulu mi mibi nsaama.

¹⁰ Mari áyitwoho nsia kundaa babo ba bákakala ya Yiisu mu matala ma báli bo kunsá pfiili ya bákálili.

¹¹ Na bágyughu bo ti Yiisu áli mweë, ya ti Mari ámono nde, bo ka bási kana o.

¹² Na mbihi oŋo, Yiisu ámoŋono mu efa ekimi kundaa binduono byele bi bíkagye ku bula.

¹³ Boho si báýabvughuru ya bágwi nsia kundaa binduono bibike. Lo binduono si ka bási bo kana o.

¹⁴ Na nseele, Yiisu ámoŋono kundaa Bakwumu ya Mumō, mu matala ma bákadza bo, ya nde afyeë bo mu ebaghala mu kuulu bo ka bási kana o ya mikolo ngyi mi bo, mu kuulu bo ka bási kana mu ba bámono nde na mbihi a na ásigihili nde na kara li ba bákpi o.

¹⁵ Na masini, nde ályele bo ndiri: «Ligye mu nsie nsyini ya litsala nsia a Nsia yi Mbwe kundaa baara bwohono.

¹⁶ Munde wu akala aasa kana ya aabagha liboghoró sa abvwughu, lo munde wu akala aagwene osa kana sa abagha ebili.

¹⁷ Bi me bilyimi bibi okinjimi bi akala biimoŋono kundaa babo ba akala baasa kana: Mu nkwumu a me, bo sa babyi mifulu mi mibi, bo sa babili mandinji ma manyaghara.

¹⁸ Bo sa bakwara bantaala, kala ti bo banmi mbagha, si okala ka bunu, bo ka bamono mpara o. Bo sa batwulu myaã na yulu a babyele, ya babyele sa badzughu.»

¹⁹ Mfumu Yiisu, bu amana obili kundaa bo, bágyene a nde ku yulu ya nde ábwi-nsini ku kwogho-a-kwogho e Nzaami.

²⁰ Ya binduono bíyitsala nsia yi mbwe mu bibini byehene. Mfumu ákasala ya bo ya akasa enyeme mu Ndagha mu bilyimi bibi okinjimi bi bíkanama.]

lxxx

Teke Sud-Ouest

Teke-Tyee: Teke Sud-Ouest (New Testament)

copyright © 2024 Wycliffe Bible Translators, Inc.

Language: (Teke-Tyee)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

6f558581-83f7-55dd-acef-3d682f6a705d